

四庫全書

集部

欽定四庫全書

集部

燕石集卷十一至
三

詳校官編修臣曹錫齡

中書_臣劉源溥覆勘

覆校官編修臣吳壽昌

校對官學正_臣卜維吉

謄錄監生_臣劉本立

欽定四庫全書

燕石集卷十一

元 宋聚撰

表

天壽節賀表

中書省恭定丙寅作

日躔析木乾坤凝四序之功
電繞神樞閭闔啟千秋之
節河清應運洛誦騰歡

中賀

元默無爲恭儉有守廓然

豁達之太度慎哉兢業之小心
繩祖武以持盈飭臣工
而求治明德恤祀聿申假廟之儀
愛物仁民誕布蠲租

之詔萬年其永百祿是道

臣等

備位台司造班文陛胥

訓誥胥教誨敢陳無逸之圖如松柏如山川願獻天保
之頌

又翰林國史院泰定丁卯作

良月就盈茂啟星虹之瑞自天申命誕膺玉帛之朝九

域尊親羣生鼓舞

中賀

量恢博大性篤寬仁治世則恒

存兢惕之心保民則善推惻隱之念壇開八陛明禋咸

秩於神祇詔下十行厚澤普施於雷雨降年有永受福

無疆

臣某等

職忝詞林班趨文石康寧好德願陳洪範

之疇清淨長生敬衍廣成之頌

又 中書省元統甲戌作

皇極建中肇應虹流之瑞明堂居左誕膺虎拜之儀慶
洽叢霄歡均廣土

中賀

忠厚及物勤儉爲心載恢覆幬

之功丕享盈成之祚稱觴長樂恒愉悅而承顏側席金

華每從容而論道以仁守位有永降年

臣等

職備贊襄

情深舞蹈歸美報上常瞻雲近於蓬萊飲福錫民敢頌

壽齊於箕翼

正旦賀皇太后表

至順四年今天子未至京師
百官朝賀興聖宮

寶位尊安方僖當陽之明辟璇宮嚴邃誕膺獻歲之多

儀時序履端壺闈交慶

中賀

仁深慈讓德備懿純中興

凝輔佐之功內職秉儉勤之訓徽音茂紀美文母於周

詩神器不搖召漢皇於代邸令圖克舉景貺維新

臣某

等

忝列外朝祇逢歲旦羣臣勸進行懼上璽於曾孫正

月始和願侍稱觴於長樂

皇后冊寶禮成賀皇帝表

至元元年乙亥作

天眷皇圖侈椒宮之緝典星輝帝座享楓陛之多儀吉

禮慶成令辰集福

中賀

道隆熙代德契前王原易象以

正家法春秋而謹始寶章玉冊肆昭名器之尊綸伏輦

衣允藉憂勤之篤日月恒久乾坤清爽

臣等

竊預闕儀

幸陪朝列情深虎拜敬祈福祿於萬年紀謹燕禱益茂
本支於百世

賀皇太后表

養備東朝輔治風資於定策禮成中壺問安克助於承
顏九御騰懼兩宮交賀

中賀

性全貞懿政布寬慈睿謨

丕祐於後人內教實光於前古明德之節儉簡約外戚
可稱太任之端一誠莊徽音有嗣茂享愉怡之福肆延
昌大之期

臣某等

叨玷清班式逢綽典稱觴長樂幸獲
覩於朝儀載筆思齊願大書於家法

賀皇后受冊寶箋

天作之配正名位於長秋王化攸基建儀型於中夏禮

成穀旦慶湓椒房

中賀

德合徽柔姿凝貞淑蚤毓祥於

勲右式儼美於古初妃掖維賢夙仰儉勤之性宸居齊

貴允資輔助之功繼以二南申以百福

臣某等

幸觀綍

典故祝明時軒轅四星永光輝於臨照螽斯多子符紀
載於歌詩

上梁文

肅雍堂上梁文

太禧宗禋院廳事

追遠奉先眷命王家之貴相基視址誕開公府之隆勅

旨有嚴臣工惟謹繫原廟之制嘗啟於昔故御容之祀
遂崇於今當禴祀蒸嘗之餘舉朔望祥忌之薦黃扉元
老總主張綱維之權烏府名流任左右扶持之職或親
祠則助饋奠或攝祭則肅裸將拭玉座之容衣秘金縢
之陳寶堯眉舜目凜然望聖之恭俎肉鉶羹宛若事生之
敬敢自謂竭忠於臣道顧每慚簡在於帝心倚注彌深
優禮殊至名位配奉常之地望曹署擬中書之規模諸
殿天臨六司星拱風軒月戶遙連太液之波光藻井華

懷近接蓬萊之雲氣豈直棲身而娛目於焉養德以齊
心式相百工載歌六偉東白塔亭亭曉日紅六合混同
思世祖欲從何地報神功南聖考靈來下蔚藍百辟駿
奔供俎豆雲車風馬想停驂西粉筆朱闥與棟齊引領
遙瞻玉泉下升平徼福建招提北欲報之恩天罔極龍
岡松老白雲深四海於今歌帝力上列聖袞龍依甲帳
歲時盱蠶爛昭昭宣室齊居承景貺下行幸有時勞法
駕宸衷至孝出天然九域雍容成美化伏願上梁之後

澡身浴德聚精會神夙夜維寅昭祖考之來格康寧以
壽侈福祿之駢臻天命用休民德歸厚

祝文

太廟時享祝文

恭定三年冬

奉先報本秩祀有常陽月式臨歲功告備適遵彝典載
歲大烝赫矣皇靈允其昭假

又 元統二年秋

奕奕大宮禮崇祀享時秋維孟蠲吉致虔報本之誠寓

茲彝典尚其昭假福我後人

太廟奉安祝文

泰定四年四月二十六日

祠官弗虔震驚清閼側躬追咎悚懼靡遑涓吉謀新奉
安惟謹明靈矜宥冀妥以寧

又

元統二年

有嚴太室塗墍告完迺差令辰還主於位皇靈垂鑒昭
格安安

皇太后尊號冊寶開玉祝文

元統元年

大母尊慈顯膺徽號維冊維寶精鏐良玖涓吉庀工追
琢伊始神其陰相克稱緝儀

天妃廟代祀祝文六道

元統癸酉

神久著靈相我國家嗣服云初漕事畢集海波不揚皆
神之力式遵彝典庸荅神休

直沽

京師臣民仰食東南轉輸孔艱慄慄巨浸歲恒無虞神
功實大福我惠我明效昭著漕臣奉祀歷年滋久初政

命使代祀報神

平江

神祐國家食我京邑漕舟歲發卜吉於茲琬示休咎惟命是聽每獲善利千艘奏功祇舉彞章用伸虔報

周涇

神祐國家食我京邑漕舟歲發起碇於茲利涉無虞神庇悠久敬遵彞典庸答明靈

路漕慶元温州台州並同

神靈孔昭相我漕事惟闕諸郡列祠有年蒞政之初遣使代祀式陳菲薦庸答神休

延平福州泉州漳州並同

神有大德捍患禦灾相我漕舟列祠惟舊莆田爲郡靈蹟所由蒞政云初遣使代祀式陳菲薦庸答神休

興化
涇洲

島同但易莆田為郡
一句作湄洲之島

卷十一

白浮山龍神祝文

元統二年二月二日

靈源北藻醞爲河渠以溉以舟實利萬世逮冰斯泮載
通厥流神其相之永祐天府

開鈔版祝文

元統二年二月二日

楮幣之作有模有文易故以新與歲更始範金爲式明
神臨之載祈成功以阜邦用

大行皇帝謚號冊寶開字祝文

元統二年二月
四日

大行有謚升祔禮嚴寶冊之成良玉爲質庀工穀旦追
琢其文惟爾有神相茲大典

代祀嶽鎮海瀆祝文十九道

元統二年作

東嶽

峙形春方實長厚嶽主宰生育協贊兩儀爰命致祠庸
伸望秩尚資靈貺永祐皇圖

南嶽

祝融所居奠茲荆楚爲國屏蔽介我要荒爰命

下同

西嶽

磅礴金天雄據直西俯臨河渭鞏固穹崇

下同

北嶽

上主辰星下壓趙境延袤朔土盤固郊圻

下同

中嶽

峻極乎天四方環鎮篤生明哲光輔前王

下同

東鎮

沂山

作鎮青州貳於岱嶽職方是紀望秩攸崇代薦常儀尚

資陰相

南鎮

會稽山

作鎮大州莫位東粵職方

下同

西鎮

吳嶽山

作鎮於秦峙形汧隴

下同

北鎮

醫無閭山

作鎮艮維產竒毓秀

下同

中鎮

霍太山

作鎮中州峙形汾晉

下同

東海

百川灌注四瀆朝宗波濤不揚餽餽所賴載遵秩祀庸
答明靈尚其晏然利澤萬世

南海

積流無極炎漲稽天蠻島夷邦以限以涉載遵

下同

西海

渟波蒲類匯澤鹿渾葱嶺于闐賴此巨浸

下同

北海

勃鞞巨澤沙漠通川窮髮之民實賴其福

下同

河瀆

源經九曲派演三門潤澤是資舟楫攸賴將命有使代薦沉牲尚冀安流福我王國

江瀆

濫觴岷蜀滌帶荆吳限隔載嚴南國之紀將命

下同

淮瀆

源疏桐柏流會泗沂與河同趨不撓不洩

下同

濟瀆

重源東導伏流下趨隱見不常利澤斯溥

下同

后土

博厚載物品類咸亨承天之功萬世永賴式遵彝典遣
使代祀以報以祈錫我繁祉

燕石集卷十一

欽定四庫全書

燕石集卷十二

元 宋聚 撰

記

都水監改脩慶豐石牐記

牐於字為閉城門具或曰以板有所蔽近代水工用之以時畜洩水行船世祖皇帝至元二十九年可昭文館大學士知太史院領都水監事臣郭守敬圖水為渠曰通惠河貫京城迤邐出南水門過通州抵高麗莊之壩

為里二百視地形創牖附崖壁及底皆用木凡二十四
慶豐其一也後二十年當至大四年諸牖浸腐宰相請
以石易為萬世利且請度緩急後先作則工不迫工不
迫則周且固仁廟勅準有司以次第舉由是至順元年
始及慶豐之役都水少監王溫臣率其屬分督程作日
役士卒及土木金石之工千有五百五十輸木萬章鐵
以鈎計凡八百有奇石材三千一百瓴甃灰藁他物無
算築基縱長百有二十尺三分長之二為衡廣高二丈

間容二丈二尺經始於是年三月之望粵六月十有五
日告成繩渠中度完好綴密公私善之明年春監丞阿
禮張宗顏狀是役之為日久近牖之高深長廣幾何糜
費物如千創始改作之緒庀工之勤成功之利之美求
識以文予復之曰世祖開物成務羣策畢舉仁廟克承
先烈措注宏遠功不百倍不改作也臣下奉行惟謹事
理之著者也記是誠宜然予疑是牖之始命名為何人
與創始之歲果豐與歉或示微意於後世歟惜莫可得

而如何也。牒非侈靡游觀之所。國計民庸。仰以給者。猶必待歲豐而後作矧他役乎。斯果作於豐年。則是役不敢妄興。民不敢苟勞。財不敢徒用。章章矣。因其役并原其名。是為記。

平江天妃廟題名記

至順四年七月廿四日。皇帝在上都御大洪禧殿。丞相臣奏海道都漕運萬戶府歲以舟若干艘轉輸東南。民租三百萬石。有奇。由海不旬日達京師者。幾數十年。颺

風不作斥冥頑不靈之物以避皆護國庇民廣濟福惠
明著天妃之力國有恒典歲遣使致祭報神今中書省
斷事官臣綽和爾乘遠以聞伏請進止上可其奏顧問
左右神居何方或以東南對上持香致敬其方授臣床
兀兒偕翰林修撰臣裝奉命代祀迺八月十七日啟行
九月八日昧爽率漕運臣薩迪密實等行禮竣事僚佐
請遵故常石刻祝辭及與祭諸臣姓名祠下屬筆臣裝
噫齋祓以祀神臣綽和爾臣裝職也捧香致祝辭勞何

有焉嗣服之君蒞政之始所以為民食報神之意則不敢不書其萬一以厲臣下云若夫顧問之旨則臣床兀兒之所面奉者也至順四年九月既望翰林修撰承直郎同知制誥兼國史院編修官臣宋瑩謹序

偃師縣尹趙君遺愛記

致和戊辰維秋九月文皇繼統改元天歷陝西諸兵承命上都過關東馳俘剽荼毒河南屬邑有曰偃師實直其衝罹患百倍民歲旱饑死徙無所睢人趙侯昉宰是

邑侯性豈弟廉恪剛敏報稱是圖竭蹶民庸綏輯孔寧
撫字篤至明年洊旱府檄且下徵歲所供烏羽獸毛鹿
脩石蜜凡若干事祈免再三府大震怒侯即抗言天子
有詔兵荒郡邑蠲賦一年常賦且然矧是微物以小廢
大悖理害仁一切復除庶安赤子其或不然移徵樂土
又曰是邑地居岡阪時雨時暘畝收猶薄旱暵五載莫
甚今歲來牟槁死秋種不入貧富餓莩疇遏疇甦西兵
之來屯戰閱月劫掠郊野搜捕巖谷服食孳畜掃蕩靡

遺賑恤莫繼租賦安出不大布惠瘡痍曷瘳蠲賦數年
始可還定圭田既荒吏稍亦鮮侯又申請權宜規措官
給粟米吏增料錢計非私已庶免朘剥侯寧惠民且及
於兵兵實邑民屯戍北南歲方荐凶兵民均貧兵符卒
徵何以應命侯援故常建言宥密一歲之中停免調集
凡是數端疊疊至論朝廷悅從功大利博始民轉徙侯
大慟之諭說留止殆什三四走持告身告飢請賑于府
于省感動上官從請發廩倍他屬邑給予絕弊不虛惠

澤侯深慮患復有一則民人流亡家產故在羣不逞徒
乘間抵隙竊毀什器冒貨田廬盜伐桑柘槐榆棗栗民
幸來歸無依何辜迺質畜夫鄰里保甲理諭法繩視如
已物樂歲民歸不怒以憾邑解兵毀無所出治侯命創
爲不病其民大爲飯羹以來餓夫基構斲塗室完民飽
僚吏同休庖庫具興匪務觀美亦裨荒政侯趨府中公
事謁守守貳僚案禮敬飲食

闕

才侯非他令比解民

倒懸

闕

民父母之感恩再造若張恭者爲輩數

百託於太常韓君方平亟來京師屬筆史製石文劖石
用報侯德平亦邑人目擊侯政謂侯之美述一漏百獲
一言焉昭示後來子侯同年固知侯者泰定甲子侯登
乙科貳守鈞州政亦可書再命是邑績懋且超終更之
歲至順壬申鉅今五年繼嘗遷秩司刑遼西府曰廣夏
用御史薦改尹安陽其名時敏字則可學云

山南察院題名記

世祖皇帝平定海寓立御史臺畫天下爲二十二道置

提刑按察司後易今名肅政曰廉訪內郡凡八道隸御史臺山南其一也廉訪實視古刺史職每道使二治理所副以下率冬夏巡行郡縣察奸黠貪治獄寬濫愈民瘼按章程檢吏牘鈎較其乖違怠弛而罪之民病不病視守令守令治不治視廉訪賢否其職重故其人難列聖恒下璽書獎諭戒飭猶慮未至歲定爲故常遣監察御史員分按各道曰體履聲蹟示勸懲也廉訪以御史至無所視事率別剏公宇爲行院至元四年冬予備位

六察分按山南憲長圖魯公洎僚案合辭謂公署題名近代盛典御史至行院未有紀載欲泝求歷年姓名又不可得斷自至元三年將勒於石而未有文敢請迺爲之言曰天子命御史大夫擇御史分按各道立經陳紀宏遠周密蔑以加矣臣下敢怠於奉行哉顧用人何如爾若聚之竊祿者將爲石羞夫聞諸道路爲聲見於事爲爲蹟已德不明而妄黜陟人可乎嗚呼古人有言曰以身教者從以言教者訟傳曰物有本末事有終始知

所先後則近道矣聲蹟云乎哉予嘉圖魯公洎僚案之
賢而能遵盛典故以是告是年十二月朔奉直大夫宋
駭記

荆湖北道宣慰使司杞梓堂題名記

世祖皇帝一天下楚武定王阿爾哈雅下江陵捷奏大
喜燕三日置荆湖行省省旋廢以地重控制置宣慰司
即勝國制閫爲理所前堂曰宣化創於大德乙巳北爲
步二十舊有堂扁杞梓宋帥臣孟珙作於淳祐間世異

傾圯殆盡使諤勒哲特穆爾懲前政簡怠曰盍新之請於河南行省得經費若干緡改爲於後至元四年戊寅大歲規制克稱威令亢爽嚴邃藩翰稱首既落成爲聽政恒所宣布燕享則始臨前堂六年冬西夏瑪南由大鴻臚出鎮閱月謂其同朝曩視事宣化當樹石紀同列姓名今屋此而石彼有乖目擊道存之義遂謀更鐫相率來請文爲之言曰慶賞刑威國之大柄史氏以直筆誅姦諛發潛德是文字紀載亦能佐刑賞萬一近代寺署

列刻察察昭示當世使人目其姓名美刺不已其勸懲之功較之史氏之於身後似畧而實切然臣也不賢華袞斧鑕不足榮辱之臣也賢惕而懼慨然而慕於忠詐回直石之功顧淺耶昔予過汴見宋進士及開封府題名碑溫國文正公龍圖孝肅公名下觀者指石成痕陷寸許以彼立國三百年名臣亦夥唯曰司馬家包家名不可以徒得信夫瑪南之微意深矣諤勒哲居位五年入為兵部尚書政簡民安瑪南之考伊德爾威大德

間常假相銜爲使位終丞轄瑪南端嚴周慎克世濟其美
同知司事都爾蘇質直敦樸副阿爾哈雅武定諸子音
達琿北庭右族參佐率能事協和皆靖共而善爲治殆
克仰體前聖倚注之深罄竭心力於修捍旬宣不特刑
賞爲勸懲張本者是可喜也詩曰上帝臨汝無貳爾心
母或曰盡瘁以仕寧莫我有庶以厲左方來者而企夫
文正孝肅之遺踵云諤勒哲字伯堅瑪南字元方至正
元年月日宋聚記

吏部主事廳題名記

吏部在成周爲天官冢宰迨後世謂之選曹世祖皇帝
定官制六部設幕官曰主事實古議卽職視各部事繁
簡爲員多寡吏部設主事員三其曹局職掌無春官司
馬簡靜之優視版曹考工若稍逸然選任黜陟擇百工
理人釐務大非金穀營繕所可儕數類其生殺予奪陽
舒陰慘之任若與大司寇對待而立切要之柄有甚重
焉者員雖三其一則四時遞妨職掌考功磨勘是專主

案牘實爲員二賀幸上京一員分曹扈從則獨署者又居一歲之半畫諾贊佐調劑均平人法並用使事物各得其理其心不曰勞矣乎任重心勞固其宜也爲貪墨曲徇爲刻削矯激者罹邦憲違官箴干物議爲正大平允爲清通簡要者道行名立華顯臺閣直理欲義利之分耳可不慎歟長安趙允升由進士出官辟掾中書西曹擢任是職蓋勞心而稱其重任者初視事將訴求前政姓名題石以敬歷未久故皆畧始自至正元年書之

徵記於予敢以慎之之幾告繼至者嗚呼世降俗漓心不相孚遂信耳目信簿書良法具矣如美意何將有瓌偉特達之士乘時變遷以求合乎古道不可謂秦無人焉至正二年七月翰林侍制宋瑩記

太平橋記

袁之萬載縣太平里大道西達湖湘東出閩浙有溪流其中歲淋潦汎濫方舟而渡徒跣者涉公私病焉里中民故新昌貳守教君遵晦家故富饒乃捐財庀徒樹石

墩作橋凡若干步屋於上凡若干楹木石載雄藻繪實
麗鑿石甃道凡五十里王官估客疾馳健步旁午欣悅
利博惠久創作於至正元年三月其九秋落成後五年
遣介謁記予惟國家武定南服無橫徵暴斂所以安養
涵煦其民亦以至矣由其上世攻苦食淡矻矻作勞晝
操籌而夜枕鎡銖積寸累困行箱溢往往田連阡陌富
擬封君迨其子孫輿服僭侈驕奢不法好閱健訟殘折
奴佃支體甚者殺人而火其廬不蕩其貲產隕身滅族

不已也史傳曰圭猗頓殆不若是或以貲爲郎入粟補
官志不過夸里閭驕妻妾而已教君獨能利物濟人以
助公家之不給又聞其能做古人置義田作橋曰良溪
鎮江錦江東潭西潭紹溪昌江仙居者凡十餘所其殆
積而能散者視予前所云者不曰賢矣乎彼能慕教君
之行是則是倣則予是文之功亦豈淺哉至正五年四
月翰林直學士亞中大夫知制誥同脩國史兼經筵官
宋瑩記

翰林國史分院題名記

題名記者翰林分院官紀名氏也至正五年四月廿有五日天子乘輿至上都從幸者則承旨布達實哩學士諤勒哲特穆爾直學士諤勒哲布哈及聚經歷兼經筵參贊官塔海特穆爾也待制則凌懋翁修撰張士堅應奉文字僕百寮遜編脩官鉅出舉臺也承旨則自至大間長院出而復入距今垂四十年不能悉舉其所之歲兩學士及經歷雖嘗以宿衛扈蹕其官翰林分院則自是歲

始也襲以泰定甲子叨科第待制由太學生釋褐脩撰
以下新進士三人皆今一至者也嗚呼職位之清華責
任之重大固不異前說曰報稱曰禮遇不能無愧焉凡
吾數人者繼此以往或數至焉或不復入院徙他官而
至焉斯文所繫者未可知姑以識歲月也院屬七人則
需次典籍官辟爲掾者任希說譯史伊魯布哈通事托
克托呼知事納穆丹蒙古書寫尚都布哈接手寫史曠典書
傅良臣也乘傳來奏捧香酒祀三朝御容暫至而即歸

者則應奉孫擴也經筵附見者凡十有四人以本職兼
譯文官則宣文閣鑒書畫博士承直郎周伯琦授經郎
儒林郎達爾瑪實哩奉議大夫王時可餘則檢討鄭啟
馮本譯史安圖諤勒哲特穆爾達爾瑪實哩書寫王可道
宋誼蒙古書寫王額森宣使扎巴吳鏞牛嘉也七月望
日翰林直學士亞中大夫知制誥同脩國史兼經筵官
宋聚記

上都分省左司掾題名記

天朝幅員倍前代庶事之繁亦然中書爲天下政本悉綜理裁決之相府受其成宰士提其綱至於究物理審事情折衷以道德參酌以典章據案具牘與奪輕重則皆屬之曹掾爲近制選辟各半咸精其技能往往練達老成由是敷歷臺閣致位卿相東曹職掌視右司重爲設掾之數亦倍之天子歲幸上都則曹十人從宰相治分省事或以爲簡而優者是大不然蓋天下之政由大都達之分省或可或否奏白行遣止付之十人顧不尤重

且勞哉故其將歸也咸誌其名氏於壁以爲榮乘輿往
返則內擇二人聽命於行在次舍謂之隨駕無逆旅室
廬之安具帳帟自隨而野處凡汲爨寢興秣飼馬乘舉
不得便適飢食渴飲不時蒙犯風霰霜露馳突泥淖塵
氛中其苦又不可言故併書以慰之於壁記之末是歲
分省者九人呼爾哈仲桓茂巴爾斯居仁達爾瑪達實可
行斯隆瑪希賢鄭志道士寧華彥方景元李思義仲得
郭德修從道李冲霄鵬舉隨駕者蘇赫郭李不至而物

故者一人崔克敬允恭至正五年七月廿又七日宋聚
記

司農司題名記

至正五年冬十一月十有七日皇帝御明仁殿大司農
臣約珠卿臣韓元善奏司農之設爰自世祖列聖相承
條制悉舉唯是刻石題志諸臣之名猶未有文謹昧死
請上嘉之勅翰林臣裴爲記臣不文敢不欽承明命欽
惟世祖皇帝以神聖之資中身受命舊勞於外知稼穡

爲治天下之本迺至元七年立大司農司秩正二品官
五人曰大司農曰卿少卿丞農正主農務鄉校水利此
肇端也十八年改農政院二十年更名務農司秩降三
等尋改爲司農寺後二年復爲大司農秩如七年時又
明年內郡設巡行勸農司爲道凡六廿又七年罷併歸
提刑按察司兼掌其事後改肅政廉訪亦如之守令以
兼勸農事給銜廉訪總其綱歲報政於司農以第殿最
迄今遵之迨仁宗朝承平日久家給人足國用富饒天

子益重其事陞秩從一以褒崇之定爲大司農五人卿
二人少卿二人丞二人幕寮經歷一人都事二人照磨
一人管勾一人其屬則若屯田之府供饒之司藉田爲
署營田設官輯要有書樹藝有法凡所以成功者於茲
備焉皇上厲精求治宵旰憂民慮農政之寢弛思作新
之至正四年命樞密知院臣約珠爲大司農眷注維篤
獎訓載嚴且擇僚佐以副之諸臣莅事維謹嘗相諗曰
吾輩荷國寵榮尚益思振厲厥職裨贊盛治然事由人

立人以功顯不有紀載曷示勸懲故有是請既得旨則以官制之定始於皇慶二年前乎是者著於簡牘後是者瑑於石焉臣聞古之人有言曰堯舜其君堯舜其民蓋臣道之能事也昔大禹陳謨於舜曰九功惟叙九叙惟歌戒之用休董之用威勸之以九歌俾勿壞夫水土穀之脩正德厚生之用司農之職九功有其六矣戒之董之之道其璽書訓勅賞罰勤惰之謂歟勸之俾勿壞者殆類是石刻之昭示悠久也比歲不登中土艱食

繼自今膺是選者精白一心恪慎乃職脩六府而治三
事使民衣帛食肉不飢不寒則是堯舜其君堯舜其民
之義也告之司農孰曰不宜或由是而有所儆焉庶幾
乎祖述禹稷萬分之一以上佐聖天子垂無窮之休亦
有無窮之聞矣謹以是題於端而列諸臣名氏其下至
正六年歲在丙戌正月日記

序

同年小集詩序

天歷三年二月八日同年諸生謁座主蔡公於崇基萬壽宮寓所既退小集前太常博士藝林使王守誠之秋水軒坐席尚齒酒殷簡潔談詠孔洽探策賦詩右榜則前許州判官伊魯布哈前沂州同知庫春前大司農照磨溫都爾奎章閣學士院參書雅勒呼左榜則前翰林編脩王瓚前翰林修撰張益前富州判官章穀翰林應奉張彞編修程謙疾不赴者前陳州同知納沁深州同知王理太常太祝成昂時鄂羅調官監濠之懷遠縣庫春

監慶元之定海縣穀廣東元帥府都事皆將赴上雅勒
呼舊亦名為雅古云執筆識歲月者前翰林編修詹事
院照磨宋褱也

宋氏七子名字序

至元丁丑春齊人宋紹明子達由西南兩行臺御史召
拜內臺監察御史與余居相近而未始相識夏六月予
備位六察與之聯事以同宗固相好也久之懇予曰吾
子若諸弟之子凡七未有名字君吾同宗命名與字演

其義以勗之宜莫君若子惟吾宋姓由商微子入周封
國所得遂取以爲類而命名之示不敢忘所自出子達
三子微字微文從字從善循字循理子正三子微字微
言得字得一律字律已子澄一子復字復關噫宗子法
廢士大夫家往往鮮有譜牒然吾宗均微子之裔非若
他氏族其所自出有不同者七子苟能達蘇明允族譜
引之意篤於人倫焉則庶不負予以類命名之深意矣
時至元戊寅春二月子達出爲燕南道憲副宗人聚序

以貽之

祖道集序

大德壬寅予生九齡侍先府君莞庫江陵延祐己未始
克還京泰定甲子忝預科名累試館閣聲聞過情至元
乙卯叨被寵榮由御史遷持憲於荆公卿賦詩光華其
行黼黻爲章韶鈞爲聲刻梓流布式昭文明是歲秋暮
月魄哉生薊丘宋褰自叙可徵

送黃君美序

至元五年予備位山南臬司分治郢復曹屬三人從行
其一黃君美性閭朗易直有才諳律已嚴治文書綜核
精詳不事苛撓尤長獄事聽斷察而不刻立心坦夷若
非業吏者明年秋選貢掾六官蓋國家制治體要置肅
政廉訪司按察郡縣視古司隸刺史職專任重掾亦如
之勢然也天下凡廿有二道道設掾十六人參用儒吏
擇廉慎通敏者掾六官暨察院歲僅二人既陞朝往往
躋華顯位丞弼亦榮幸矣哉由西南二行臺所隸各道

以進者爲資格又迂緩惟內郡八道隸中臺與選貢爲
速化其開拓於資稟若習氣之狃豪悍深削挾知術擅
威福敗德隨事萬一致物議之云云則又不得廁名列
亦惟艱哉君美行衆咸歌詩以贈予告之曰孔子曰不
患無位患所以立不患莫己知求爲可知也六官之司
曹局甚夥天下之事實準則焉裁決措置其當否基於
一掾之口君美知所以立舉不足患視一掾難而易上
官臆見不齊怨隙交惡甲是乙非訛訛口語調和將順

使人情不乖戾事事當理視一掾易而難勛哉君美幼知讀書長觀光京師受御史牒薦補吏濟寧再薦補掾淮西憲遂遷山南處速化之地向所謂物議之云云者未嘗及其身由是而履前轍所底之可榮幸者執左契然是可稱願也聞其上世以鄉里數被河患多藁殞者是行也市杉柏材以歸治棺槨將舉十餘喪將葬之此其行又可書君美名秉彛譙郡人後至元庚辰八月奉直大夫僉司事廣陵宋賡

孫母九十詩序

世言壽徵者曰氣血之稟也曰彼水土宜壽飲其水食其土所產致然也曰仁者壽也曰陰德也曰勤儉以得之也由氣血水土天也人爲者仁陰德勤儉也憲掾孫允暉母夫人馬氏年九十就養於荆聰明康強其壽徵於所稟若飲食若陰德舉莫可知婦職助祭祀主中饋循壺儀宜若無事功可暴白其仁與勤儉者蓋允暉始爲保定人考某君以某年徙居亳夫卒時年若干夫家

素清苦無田園之入金帛之畜食啖厲其家人事蠶桑
織紉爲衣食資教子樹德讀書遂致身風紀跡是則次
與儉勤享上壽非幸也宜也何也昔者魯大夫公父文
伯退朝見母方績曰以歎之家而主猶績乎其母訓有
曰民勞則思思則善心生勞非勤儉善心非仁與夫夫
人之行敬姜之辭也誠哉夫人之壽宜也非幸也衆歌
詩以爲壽夫奚疑然曾子養曾皙養志曾元養曾子養
口體禮曰將爲善思貽父母令名必果養志貽令名稱

副夫人之壽吾深有望於允暉若甘旨滄瀨之奉承言
怡色之禮夫人能行之年月日宋聚序

志勤齋序

有詩

燕人楊元卿由其外父單周臣爲予婦翁確齋劉先生
母黨尊文遂相知今二十年周臣爲帶下醫有聲京師
所與交皆中原耆舊名公卿才大夫士元卿幼孤弱冠
時周臣喜其能卓然自樹立納爲贅壻盡以其術教之
元卿持心堅用力不怠汲汲焉期其業之成有不遑暇

食者周臣歿克世其業且嗜讀書臨帖久之用太常薦諸天官氏執籩豆之役於宗廟郊社習禮樂名物度數每事無不問蓋求效其職以獲譽而進者是役書滿廁流內銓秩第九品掾紳子往往有自此躋華貫嘗取志勤顏居室以自勗其學遂求說焉古人有言曰有志者事竟成天下古今事無鉅細其成也率基於志志立則勤隨之事功迺集焉聖人責宰予晝寢志氣昏昏教無所施也爲警枕爲錐刺股手不停披口不絕吟始曰志

勤哉噫元鄉之爲學當視醫伎視筮仕則勤可以成其
志矣奚其難抑今之志勤者富貴之謂也學云乎哉敢
以是爲說而系以詩 萬里橋邊江水長貴人駟馬畫
生光是誰能識詩書味長白山頭蘼粥香 螢囊雪案
度青年珍重夫君亦自賢鞍馬歸來成內媿眼花頭白
枕書眠

贈慈化寺僧妙愈序

宜春南泉山大慈化寺普庵禪師自宋孝宗乾道間示

寂由能陰佐民物累贈謚曰寂感妙濟真覺昭貺表其所藏之塔曰定光聖元版圖混一大江之南凡民值水旱疾疫禱於師輒應尤崇敬之成廟時守臣上其靈蹟加謚大德仁宗延祐間再加師號曰慧慶塔名曰靈瑞仍命詞臣文其磚石以褒美之德至渥也自勝國迄我朝贈謚爲字凡十有二所以稱頌其盛德妙行亦已極矣至元五年冰溪張熙祖守袁以師之能福是郡而報稱猶若有所未至乃援禦災捍患之典載請於朝住山

僧妙愈擇其徒之能幹蠱者曰普沾資遣詣京師致其
牘於宣政既達於帝師迺至正四年夏四月事聞制加
古佛以冠前謚贈扁曰大護國慈化禪寺中宮聞之亦
錫纓絡寶旛以華其供仍以金襴袈裟被於愈身明年
冬沾南歸朝之顯者咸嘉愈克副邦侯奏請之意善於
擇人得沾之才上下兩都五閱寒暑竭蹶奔走跋涉艱
苦晨夕懇謁以遂其志宜爲歌詩以賀有成焉嗚呼由
師至愈踰二百年十有餘傳矣世稱其靈彌著故尊信

之者彌甚張侯之心及愈之志不待著蔡可以逆計其
必醺也是惟無請請則必從雖然是舉也非張侯啟其
端則無以始非愈能任沾以效其力則無以終尊信之
者易於爲言以相之則又本乎師之感格之神也愈號
藍江沾號澤山云至正五年十月翰林直學士兼經筵
官宋聚序

送宋子與赴官淮南序

臨江宋子與以至治癸亥來京師手書一道介其親友

翰林檢閱歐陽南陽拜先兄正獻公於私家正獻時爲翰林修撰致其所著詩文於故侍講曾文貞公中丞石田馬公今翰林承旨圭齋歐陽公侍書博士虞公伯生挈而進之皆美其學而器其才且薦之期以文顯泰定甲子奉宰相命爲太學生時子與親老未獲祿養而定省曠且監學積分試例未定嘗欲決去正獻苦畱之未有以處也會天歷間開奎章閣藝文監招延天下文士正獻首爲太監遂擢從事監中未幾正獻薨子與亦丁

內艱服闋復至京曹馬諸公皆相繼仙去識者固少而子與以親老不欲留中迺佐幕章貢子與喜人皆惋惜之迎養赴官不及歲親又喪今年秋來謁選天官氏悉其賢將用爲史屬論定矣適病疾瘡頗苦自念雖仕於朝亦不得挈其室家偕來又力求外補遂授兩淮屯田府知事公卿大夫士凡識者皆矍然駭曰子與又不在館閣耶子其行也咸贈以言而屬予序之子惟子與孝於親敏於事功行美而識明氣高邁援筆作文不苟詩

句清麗沈着痛快其才可謂全矣自至治迄今凡廿有三年而仕始至於此謂之不偶可也然國家土宇廣遠願仕於朝者不少間以儒進者雖顯矣而名不稱情若子與者言乎仕若有歎而其文其行始爲諸公所期中爲所惋惜且駭之實可以聲音笑貌得之乎名者造物所靳豈盛於此而劣於彼耶顧子與年強氣壯學業日宏以肆天將用之人其舍諸予知其長轡遠馭之所至終可以釋且惜且駭者之疑之憾而副所期者裁鑒之

精又可以實予兄知人之明之左驗也幸無諉曰豈無他人不如我同父至正五年十月宋褰序

送墨工魏元德序

至正五年六月庚午皇帝御慈仁殿中書右丞領宣文閣事臣達實特穆爾進魏景仁所製墨朱戶敞晃錦囊啟封玄光溢目芳香襲左右上嘉賞之勅崇文少監臣明理藏於閣命賜內帑幣帛景仁拜辭下臣褰是日進講亦與觀焉明年春景仁將南歸別造新墨以獻大夫

賦歌詩贈之予序其事始景仁來京師三年館閣諸臣
方被命修三史開局聞景仁墨善雜出他墨作字列試
之以定優劣其色瑩而凝透繭紙背其品少亞於古今
工皆退舍於是爭售用以畢史事及好古名能鑒裁者
往往市爲文府珍玩嗚呼墨小物也景仁布衣也上被
恩寵下收善價其伎之精有足以動人者如是夫子夏
曰雖小道必有可觀者焉然吾嘗閱比年醫卜百工伎
藝挾其能遊京師者始焉竭其才精其術以覲有所遇

既遇矣志驕心怠怠則業荒驕則譽喪悲夫景仁之行
當益遡考古法叢美劑工製作以報稱際遇而重獻之
則其所獲又不止是彼驕怠者將有所警矣景仁字元
德大名人世其業於上饒之玉山至正六年正月翰林
直學士兼經筵官宋瑩序

燕石集卷十二

欽定四庫全書

燕石集卷十三

元 宋褰 撰

雜著

災異封事

至元三年丁丑

監察御史臣宋褰伏惟天心仁愛人君凡災異之見所以示警戒也人君畏懼必修德以答天意然後久安長治享祚無疆此有國之常經古今之通義也我國家承平百年有餘列聖臨御未嘗不兢惕畏天故至今日皇

上即位以來垂衣拱手未有過舉然而一歲之內日月薄蝕星文垂象洪水爲患闕前火災又自八月十四日夜京城地震自夜達旦連日不定太廟前殿一室牆圯神靈震驚其餘官廨民居間有毀塌蓋京師天子所居宗廟社稷所在是以民心皇皇上下憂恐災異迭見萃於此時豈國政猶有所未修民瘼猶有所未愈以致然歟理宜奏聞集議講求弭災之道務求實惠不尚虛文然後可以上答天譴下遂民生伏望陛下畱心修省早

回聖駕不勝甚幸

建言救荒

至元四年戊寅按部京畿東道

竊見檀順通薊等處去歲夏秋霖雨及溪河泛漲滄沒
田禾十損八九已蒙上司累次查驗卑職亦嘗親詣被
灾鄉村一一體覆除另行外所至之處人民告訴百端
生受情狀可傷飢寒藍縷不能存活強壯者猶能趁逐
微細生理日求升合老弱無依之民掃棟稗穀以粥飲
度日未蒙賑恤極被擾害蓋緣鷹坊牧馬并各枝兒怯

憐人口等指稱昔寶赤爲名騎坐馬匹懸帶弓箭器械動輒三五十人結成羣黨間有攜帶家小隨處坐住旬日又復他往須索酒飯鴈食等物州縣官吏不能辨其真偽畏威懼勢尚被凌虐不能支撐未免齊歛已是不堪猶且未能充其所欲故意徧往鄉村店舍害及貧窮被災之民自給不暇縱有一二溫飽之家百般被其騷擾雞豬口糧爲所搜奪若從其所欲則無辜之民些小蓄積不能一一應付稍或推阻訴難輒便吊縛拷重

者傷殘肢體性命或男子趨避逃匿又行凌辱妻女被害之民亦知州縣官司不能禁治無所申訴往往拆毀門戶拋棄菴廬全家流移逃避冤愁苦楚去住兩難嘗聞國以民爲本民以食爲天今日歲且洊饑民將胥斃爲人臣者理宜深憂痛念有生之民皆吾皇朝赤子性命衣食無非感戴國恩然果因差發稅糧征戍屯衛等事爲國捐軀碎骨分所當爲今縱此曹竊圍獵之名逞戕害之事政使善良倒懸黎庶驚駭不能聊生民之疾

苦莫此爲甚致傷和氣實由於斯若復飛放之出百姓
何以支持卑職忝居言路安忍視爲泛常目所親覩不
敢負國即日春首飢民救死不贍如蒙憲臺具呈都省
設法禁治擾民之弊其貧乏之民仍加賑恤俾遂生全
誠國家之大幸

劉靜修改封謚陞從祀文

竊惟道之大原出於天宏之則存乎人堯舜禹湯文武
周公孔子心法相授統緒相承自茲以降漢唐歷代名

儒宋九先生我元朝許文正公皆以得其正傳故從祀
孔子廟庭實爲尊崇賢哲啟迪世教之大義也伏見故
集賢學士嘉議大夫贈翰林學士資德大夫上護軍追
封容城郡公諡文靖劉因以天挺英邁之姿廓自得正
大之學負浩然之氣真知力行崇高之志清修苦節
其言論則主乎大經大法其念慮則存乎致君澤民傳
注有功出處合義夷考盛德克配前人如蒙上聞從祀
賢廡不惟彰我朝有大賢之才接道統之正抑且表聖

上崇儒重道興起斯文之心又且爵封容城郡公諡曰文靖容城乃保定一縣即非郡國以靖配文義若未稱宜從合於部分太常禮官改議封諡相應

宋高宗帝紀論

時爲國子司業預修宋史

史臣曰甚矣高宗之不幸也君於衰亂之餘時危勢迫兵弱財匱敵兵歲擾播越窮僻重以苗劉羣盜之亂其立國確乎艱哉世美其能法祖宗不妄殺至禁用翠羽鹿胎澤及物類寬慈仁厚宜若可稱然以李綱趙鼎張

浚終於竄斥岳飛父子寃死於大功垂成良由數窘兵
難魂怵魄駭餌賊檜和議甘不絕口顧崇其功任以威
權刑賞黜陟反聽其命是以忘親忍恥怙墮畏懦境土
不復獲罪當時悲夫

太古字說

監察御史高昌拜珠字太古日與予聯事諗予曰朋友
命以字舊矣君文人幸衍其義教我子辭曰予不啻不
文且有疑焉太古當泰定初丞秘書監予嘗備員典校

時相先後未始識其人然聞公卿大夫士交口薦譽者
十有五年矣其言曰太古不崖岸不畦畛不陷穽機巧
真淳樸茂洞達樂易今乃識其人服用冠佩車馬屋室
殊非洪荒之世大庭赫胥之民無標枝野鹿之態或者
哂曰子文人也論人以心乎顧以迹乎不崖岸不畦畛
不陷穽機巧真淳樸茂洞達樂易者爲今人乎爲古人
乎子斂衽歎服其言之能釋予疑遂志之爲太古字說

趙宗吉真贊

名承禧至順元年進士由翰林院
編修辟御史臺掾平陽人

睥然者容屹然者躬縝栗其外淵沉其中負汾晉之勁
氣振章逢之高風固嘗效編摩著作之力又豈不足建
臺閣廊廟之功此所謂觀其德符而可以體其道充者
耶

酬德子元多冠像贊

彼美一人被服惟寅凜冰霜兮中抱若將批兮逆鱗貌
溫而恂恂氣肅而閭閭山立兮揚休正笏兮垂紳是蓋
嘗始命而攬轡於秦隴滇蜀再出而按部於楚粵甌閩

者也揚振洪綱趨拜紫宸諫遊幸於春蒐備顧問於時
巡其所以守正持平蘊秀含淳者固基於父兄門地培
植之厚仍重以詩書禮樂浸灌之純使人望之足以摧
姦慝化犢驚又何必規規然跽耶觸佞然後稱剛介之
臣德潤乎身澤加於民臺閣雍容高步遐振乃知是丹
青之筆所以權輿乎黃髮兒齒之生面於麒麟也

司濟民畫贊

名楫平原人由蓬萊尹爲山南憲
司知事年六十八

氣充分色愉神肅兮貌臞表風儀之深覲豁衷素之崎

嶇是蓋孕靈於濟岱之境務本乎青齊之區然後致臺閣歷練之明達脫郡縣奔走之勤劬所以垂裕子孫藏富田廬者乃福澤培養之厚豈屑屑於法令簿書者乎贊我諮諏強力有餘方將收之桑榆而奮翼遽可以告老而懸車也耶

御書和齋贊

裕皇出閣世祖命太子贊善臣王頤侍講讀東宮裕皇所習字書凡六七幅皆如家塾常式署御名髹櫨金滕

中秘嚴謚臣典校時獲欽觀之逮仁廟聖慈每獎諭臣
下進階官御批付中書手筆莫不錦標玉軸珍藏於家
後至元己卯臣叨恩司臬山南中興守臣阿哈瑪特出示
今天子御書和齋二字筆意雄渾布置端嚴日星炳明
風霆鼓動雖聖學天成祖宗崇文之所自也謹拜手稽
首而述贊曰於赫我皇睿知天資聖明文物時出用之
維昔東陵暫駐六飛貳守陪扈敬恭奉持帝嘉乃心寵
錫宸翰昭回穆清其光有爛奎耀於躔虹采是貫飛白

鄣唐題劍陋漢聖祖崛起龍朔洪荒列聖尚文中外寶
藏我皇緝熙列聖有光臣製作贊式叙天章

淮東僉憲耿彥起畫贊

名汝霖京師人

目炯兮顴高氣肅兮神韜有莪者冠有粲其袍所以躋
華顯於昭代實兆乎孕清淑於神臯善澤涵濡文教薰
陶載瞻風儀明監莫逃唯周慎可以立勲業唯峭厲可
以懾貪饕然後允協乎秋霜烈日之義邈矣夫五佐三
輔之豪謂宜騁羈靶於驍騰歷廊廟而遊遨慨屢持於

憲節殫六轡之賢勞繫刺促乎憂民致駸尋於二毛福祉之至川流滔滔吾將遲老成之徵用遽可歎其不遭也耶

特穆爾布哈多冠像贊

字仲彬今湖南監憲

凝然其軀炯然其矚貌古而容舒氣肅而神愉是爲中朝鐵面御史之圖和粹深潛謹厚安徐坦襟度之無間恢材器兮有餘知之者識其爲華顯之族不知者以爲歛然退讓之儒我有夙好翱翔宦途出則並駕坐則聯

裾知之深而敬之篤故能模寫其萬一庶可以敦乎薄夫

清敏齋銘

山南憲司經歷散竹仲文之號

振振幕賓顏扁昭示儆戒無窮稱述有謂貪墨由濁懦不立志清心潔身敏以集事猗與休哉顧諟勿替

祭文

誠夫兄大殮畢祭文

維元統二年歲次甲戌十一月二十九日癸丑弟翰林

修撰裝謹以少牢之奠致祭於亡兄集賢直學士國子祭酒誠夫公之靈於惟顯考生我弟昂同胞五人厥幼爲駁弱不就傳實受學兄謂材可教變化昏鴛十四而孤俾不廢業流離南土同飢同寒稍長及冠侍客浚都艱難跋涉靡遑寧處道蔡淮江返覲南中同事筆研爲舉子業母氏棄養同還京師兄魁文場我戰弗利劇淬再鼓忝預末科同仕王朝于今十稔妻孥同饗迄無間言裝生卅年獨共兄久暫違之日十僅二三方期樂康

擬倫春泮皇天后土乃遽奪去生離弗堪遂成死別邈
矣音容不同斯世嗚呼哀哉其痛如何載惟我兄孝親
忠君學古而文剛廉介直之人之德之志之學弗仲弗
究僅止於斯嗚呼哀哉其痛如何今茲之辰斂藏五體
柏棺杉槨敢曰無忤幽冥異途不可復見割牲陳奠式
薦哀誠嗚呼哀哉同胞五人厥幼爲褻物故者四惟褻
獨存其痛如何尚饗

祭中書左丞王儀伯文

維年月日國子監丞張彞戶部員外郎王守誠翰林修
撰宋褰應奉塔布台程詠典籍諳都樂濱州同知巴延
大樂署令巴延謹以牲酒之奠致祭於故中書左丞王
公之靈於惟我公天挺英特氣邁學醇才副厥德剛方
闡朗誠篤淵塞蔚爲儒宗佐我邦國受知明聖崇登峻
陟典郡仁惠贊政忠直善良我知僉士我聖羣疑衆難
剖辨極力古今事物原委失得毫末洞見陳說不息暫
居侍從謹論肯默開示士子講問戒飭諄諄面命貌溫

可即耽嗜經史樸素服食不矜不逸小心翼翼猷爲述
作器量鑒識靡一不善昭示典則嗚呼哀哉明哲之資
承弼之職瞻仰之重信任之審六十而薨畜憾在臆朝
著卿士驚惋愴惻我等小子情曷可抑甲子廷對庸菲
愧慙公位闕天子有勅公預讀卷品第無惑載沐教
誨均被培植疾革憂疑訃至痛盡聚首投淚阻於匍匐
敬致牲酒託祭墓側式薦哀誠傷悼何極

祭特穆爾布哈大夫文

爲御史時作

維至元四年九月壬戌朔越十一日壬申御史中丞某等謹遣監察御史劉承祖以少牢之奠致祭於故御史大夫特穆爾布哈公之墓惟公稟靈穆清襲慶忠良臣隣之資邦家之光德粹而厚貌恭而莊儀型山嶽聞望珪璋禮義詩書教化綱常遜志於學大業昭彰動止有法言笑不妄却遠華侈冲虛自將素位富貴驕奢不萌列聖股肱任重力強式副眷注弼諧謨明僉壬小人我則力戕直清公忠我則載揚彈壓百僚師表四方主持

國是振舉憲綱功在王室論協贊襄令德令儀不僭以
夾嘉謨嘉猷致君虞唐謂宜奎父遐福熾昌謂宜紳笏
磐石棟梁云胡邁疾淹延竟亡國誅珍瘁宸衷悼傷矧
在同列痛心惶惶弗克予哭窀穸之藏馳情官次遣祭
墓傍有俎肉崇有酌者觴邈以將意涕泗惟滂嗚呼哀
哉尚饗

省墓祭考妣文

惟至元四年歲次戊寅十一月辛酉朔越三十日庚寅

孝子監察御史裴謹以牲酒之奠敢昭告於顯考安仁
縣尹贈嘉議大夫戶部尚書上輕車都尉范陽郡侯府
君顯妣范陽郡夫人李氏之靈伏以生育之恩昊天罔
極日月不居棄養逾世裴縻宦籍違遯先塋久缺汎掃
負罪幽明展省來茲適值遠祥敬陳菲薦不勝哀慕尚
饗

祭二先兄四先兄文

維年月日弟裴謹以牲酒之奠敢昭告於先兄道州學

正弘夫息州稅務都監達夫之靈茲以王事來荆展省
先龍祔祭於位不勝哀感尚饗

祭謝檀齋文

維至正元年歲次辛巳八月丙午朔越四日己酉翰林
待制宋聚謹以柔毛酒酌之奠致祭於翰林直學士贈
國子祭酒文安謝公之靈而言曰惟公之生天性卓然
正學既明多藝且賢聰悟非常聞見實繁讀書則五行
俱下義理隨解作文則縱橫出入倚馬萬言人見其文

章議論之浩瀚孰測其抱負蘊蓄之淵源百氏汎覽易道獨玄其知默守豈徒窮研故始筮仕而佐牧已澤及乎民物累拜命於館閣闡文教之昭宣數議政於大廷凜操守之獨堅苟委寄以重任邈官業之可觀何蒼蒼之莫測脩痛恤於逝川嗚呼哀哉竟不少延始予羈紲公始加冠從我正獻與公周旋棲遲嘯傲荆楚往還予壯公老同立朝班交久情密與同悲歡居則席接出則轡聯評議則臆見多協辨論則脗合不偏譏謔笑怒肆

其瀾翻不少芥蒂灼其肺肝公之交子序齒則懸尚論
鄉井公蜀我燕始終無間禮義不訐予或畧其兄事之
禮公亦謬以爲才俊而相憐我知公深不苟不煩進退
以義知命樂天汪洋若陂性宜佩弦有所制作厥思綿
綿操觚遣文力追古先辭旨微直風氣渾全其來也滔
滔江漢之波其成也巍巍嵩岱之山流麗乎短章揚侈
乎大篇黼藻典冊筆削簡編粲烜赫於當代示來哲於
不刊悼斯文之不幸慨不作於九京嗚呼哀哉竟不少

延前歲之別予已惡年命之週於甲子今則薨逝僅加
一年始聞病疽驚惶不安當公壽旦聞訃襄樊由荆而
秦子縻於官一酹臯緩罪莫自寬赴召禁林艤舟江干
割牲醢酒於公新阡宿草不哭禮經有傳朋友大義予
豈無權思公之切晝夜不捐今茲猶寄書於地下未以
爲永訣於重泉公貌莫覩魂庶可還音旋聲淚俱下公其
聞焉尚饗

燕石集卷十三

欽定四庫全書

集部

燕石集卷十四

詳校官編修_臣曹錫齡

中書_臣劉源溥覆勘

覆校官編修_臣吳壽昌

校對官學正_臣卜維吉

謄錄監生_臣劉本立

欽定四庫全書

燕石集卷十四

元 宋聚 撰

碑誌

從仕郎翰林國史院檢閱官姜君墓碣銘

有序

君姓姜氏諱天麟國祥其字先世傳自隴徙長沙實居之曾大父必政大父應期咸戢景沒世考時可勤儉樂施里閭善之贈從仕郎秦州成紀縣尹妣谷氏賀氏並贈宜人君賀出也生之年爲至元戊子天歷二年四月

廿又八日卒官京師明照里得年四十二其秋從母弟
楊端狀君行實懇予曰內兄與君同科甲且交最厚善
今物故銘墓石者宜莫君若敢請予義不得辭遂叙次
之君幼歲資警拔端秀成紀君誨之畧不假貸每期其
興宗未成童成紀君棄世且屬兩宜人以教君爲務君
即服膺先訓勉就外傳稍長惟學由靜成也徑去登南
嶽曉霞峯讀書五年不歸家弱冠走京師方求見鉅人
元夫請益以卒業復惴惴貽去親遠遊憂獲罪名教輒

南還時詔舉德行明經科迺屏斥世故痛自刻厲講肄
嶽麓精舍久之二妣繼不幸終喪復入京至治二年故
相東平忠獻王以君嘗遊其門堂帖下胄學補內舍生
明年中大都鄉舉又明年爲泰定改元禮部貢舉廷對
賜同進士出身授將仕郎翰林國史院檢閱官預修英
廟實錄史館屬首待制官下追典籍凡六等檢閱官次
在五故事僚案才屬時望者被學士院薦奏不計資給
以次進居上列曰遞陞或移文銓曹再給告身易階官

仍舊職曰勤畱四年君將滿秩法應得七品恒念亟被
恤典則少報罔極會學士院勤畱章抵天官遂改從仕
郎復任檢閱官數月封贈命下喜曰鄉叨科名第華吾
身今寵賁考妣庶慰祿不逮養之萬一矣重以近代尚
焚黃展省禮蚤夜嬰念慮不頃步置以官守竟不暇命
端代行每惋惜不舍娶唐氏封宜人亦能相其夫子者
子男三瑜瑾謹敏知嚮學理尚幼女一在室以年月日
塋君於某州某縣某村某山之原嗚呼予固未始識君

及同登進士第後聯預史屬南諳其爲人性嚴整雅潔
愛交遊飲酒尚氣後人遇一言合即欲與之終身少不
直意則棄去不復顧見閭閻懦緩者噤不一談仕翰林
製撰寡尠無可事者獨以才器自許其恒言曰朝家設
科取士士抱負所學貴其用世殆非止札翰詞藻而已
當挺挺自致於曹局有司簿書期會力踐華顯暴著儒
效顧可爲人迂邪噫察君之言俾才與壽稱如敬歷幸
願其事功果何如哉予故哀而銘之銘曰士秉淑靈毓

才經德用舍繫天庸心則惑赫赫府怨置散奚慙天實
命之我承我堪嗟若姜君質表亢爽仕品登七亦既優
獎奮欲行已直情毅然天莫予從抑志弗宣惟昔問學
凝於孤苦持循先訓靡輟寒暑力不鹵莽天忱報之慶
賞及親有子書詩江潭之源載崇惟隴地善日協膚裔
承寵植石孔堅用鐫我辭我辭不誣式者監茲

大中大夫陝西諸道行御史臺治書侍御史仇

公墓誌銘

有序

至順三年春太中大夫陝西諸道行御史臺治書侍御史仇公稱疾自免僑滄之長蘆鎮冬十一月廿有八日竟以疽發背薨明年春子朴格護柩來歸將以某月日祔塋大都宛平縣夏莊先塋狀世次行事道公治命泣拜屬筆銘墓石予不文哀存歿義諾之公諱濬字公哲上世家臨潢徙京兆金爲燕人金蘭州司法忠源爲高祖明威將軍福爲曾祖皇贈集賢直學士亞中大夫輕車都尉南陽郡侯德明之孫奉議大夫福建閩海道肅

政廉訪副使贈嘉議大夫禮部尚書上輕車都尉南陽
郡侯鏐之第三子至元十八年生長安幼喪母適世兄
銳尹蒲城縣畱撫育之既而侍尚書公閤中還讀書淮
浙大德四年尚書薨孤苦無依賴然卓有樹立志會舅
氏故中書參知政事郝公拜戶部尚書挈還京師十一
年武宗即位太保曲出引見便殿有旨侍仁宗說書東
宮至大二年授將仕佐郎資國院照磨辟禮部令史轉
掾集賢院延祐間遷從仕郎大都護府照磨用爲中書

左司掾郝公薨棄役理喪葬事至治元年進承務郎太廟署令英宗親享太室百工執事惟謹公密通薦裸進退稱旨改禮部主事泰定元年以奉直大夫拜監察御史先是他御史劾中書參政楊某贓狀得旨將訊詰宰相欲逭其罪奏補省臺宗正雜治公抗疏曰御史臺職專糾劾今宰相欲變亂祖宗法不可誓以死請竟從臺鞠杖免有貴幸嘗納伶婦爲側室適奉旨充太廟時享獻官公監察即朝堂誓齋所斥其不潔不可事祠祀代

去河東鹽運使吳某盜用官物事覺公駟往案問奏罷
之二年河決雨水百姓流殍疏請會集元老大臣講求
致災之由弭災之道會地震蝗旱災異逾甚公及二三
同列毅然上封事謂地陰當靜今動得非執政有失調
變乎又兵亦陰象得非掌樞機之臣軍政有所不修乎
宜修實效答天戒俱不報章三上陳缺政併言御史大
夫呼圖克圖奸邪不忠曩附阿宰相曲庇參政楊某自隳
紀綱不勝重任移文上都分臺事聞大夫罷宰相不悅

激天子怒行幸還將羅織罪名逮捕治書侍御史苗某
治書侍御史蔡某等繫詔獄置對公等上印綬待罪於
家衆懼禍不測公泰然以處獄久始釋置公等不問其
他前後列論如額森特穆爾在樞密日嘗受賕今不當
知經筵事太子詹事輔導之職今不當用宦者某爲之
姦臣特們德爾罪惡無狀先朝已籍沒今不當回給貲
產浙西廉訪使王結篤學廉直爲一御史挾私妄論今
當伸雪處士吳炳史約等當召赴館閣內外官文行優

者參政班辰張昇等二十餘人省行當任風紀拾遺補
闕稱職一時久之起爲宣徽院經歷四年升奉政大夫
戶部員外郎明年進朝散大夫吏部郎中天歷改元廢
政更始御史臺奏除僉燕南河北道肅政廉訪司事未
上改中憲大夫禮部郎中明年遷右司員外郎旋改刑
部侍郎進階亞中閤月授中政院判官內批階官中大
夫以獎之至順元年復除江北淮東道肅政廉訪副使
再遷吏部侍郎皆不允命參議樞密二年拜西臺命至

則承荐饑之餘方務綏輯而公不可留矣公性沈亮雅
潔涉獵經史通吏術期待甚重審思慮恒自周防不妄
然諾才裕而稱位可尚也夫享年五十二歲祖妣王妣
郁娶劉俱封南陽郡夫人子男二朴國子生及格也女
二長女適晉陵張碩次幼銘曰我驥我馴我璧我珍彼
蹶與瑕嗚呼奈何我駿我白何害於昔憾固可以釋銘
告營魄尚安此玄宅

國子生杜儉墓誌銘

有序

泰定四年秋先兄正獻公時爲禮部郎中訪翰林編修
孟道源語次見少年貌皙身頽然磬折入斂容揖正獻
目其詳緩慎重問孟君曰生誰氏曰中書東曹掾杜宏
道子也歸以語褻明日告故禮部員外郎王景荀曰爲
我語宏道吾長女子年將笄欲與爲婚姻家宏道喜諾
天歷二年醮禮成生子閏郎寧寧皆及朞天至元元年
春生以力學致疾七月十五日戊午歿年二十五以是
月二十三日丙寅葬保定定興縣先塋之次生資通敏

明坦自兒時沈靜寡默不妄戲笑不憚飲酒嗜讀書年
十七以胄子入國子學晝夜且誦且綴文時國子生以
年及二十五乃積分得貢試年及而生歿矣故公卿大
夫縉紳師友莫不惋惜初國子生員漢人朝官七品以
上之子聽補二百人而他有奉旨以凡民廁其間或言
其非國子中書令禮部詳定宏道方爲其部郎中同舍
生或嗾生曰吾輩以公卿子弟入學今他入者衆盍白
而父從其言生曰功名有定分吾輩讀書而操心如是

不可且吾父素嚴毅不敢以公事請同舍色沮烏庠即
是可灼生不死他日並仕無躁進念明矣生慈孝純慤
居家日與里巷浮薄子弟絕不相識僮婢小有過未嘗
怒詈捶撻元統二年冬正獻薨子幼生治喪紀凡五晝
夜不寢息事賴以集生既病兩閱月子寧天父母懼生
傷悼生則慰父母曰兒病敢以哭子加重貽大人憂乎
彼殤子也大人亦不必傷病革父母問所欲言生曰兒
何言兒何言但不幸爾然兒嘗質衣於人得鈔若干市

書數卷今存篋中幸贖以歸蓋初婚時正獻所賜也生
名儉字景裕生於皇慶壬子二月二日曾祖某贈某官
祖某贈某官父今爲中書左司員外郎正獻則集賢直
學士國子祭酒諱本字誠夫也左司由翰苑進掾中書
歷位華顯樂易豈弟不與物忤生之歿也衆咸深疑父
子皆非獲罪造物者故痛惜之或謂正獻不滿生名欲
更之者左司曰南齊王仲寶唐唐茂素裴守約皆是名
庸何害今竟不壽豈識耶子哀正獻妻生之志不終述

衆人之所以疑且惜者爲生銘銘曰天子其俊秀而不
畀以壽且再奪其後是爲無窮之悼

贈鳳翔知府牛公神道碑銘

有序

至元二年冬長安牛景衡致書於予曰先父詵仕大德
延祐間以材幹謹敏積官三品援國制應封贈二代嘗
請於朝曾大父順贈中順大夫鳳翔府知府上騎都尉
追封隴西郡伯大父大用贈亞中大夫僉中政院事輕
車都尉追封隴西郡侯上世皆葬高陵以某年月日改

卜長安縣金光門小郭村之原以鳳翔府君爲新兆初
祖方將謁大人碩儒文潛德劖諸石樹之神道以彰於
世未遂而先父歿矣景衡不肖敢不卒成先志哉君嘗
職太史敢致事狀以請按公諱順字某資孝友有器局
系傳出唐相僧孺後世爲關中高陵人屬兵燹之餘先
世諱字爵行皆逸金季喪亂公挈家避亂關東冒鋒鏑
歷艱險夜竄匿岩壑晝採拾供養父母竟不懼於患皇
元革命息兵關中南定扶老攜幼還鄉里改籍長安迺

葺田廬務耕織訓頑惰治荒蕪勤課業厚衣食節財用
戒佚遊家業日裕養親主致篤樂於教子不肯祿仕終
身年八十有奇某年月日卒於通義坊居第正寢配關
氏追封隴西郡君子男一即大用孝慈嫻睦有父風孫
男七敬義誥溫敏惠讓敬承諸王教某處長官義陝西
鹽轉運司庫副誥嘉議大夫奉元路總管致仕溫雲南
大理宣慰司都事惠從仕郎秦州判官敏讓孝弟恬默
克家不仕孫女二適劉瑞張某曾孫男九元德克柔景

權景衡從古宏毅永安楊奴楊驢曾孫女十二俱婉名
族噫即公治家觀之顧豈不可用世者壯則時危不可
仕時平而公老矣今其子孫蕃衍列仕版雍睦同爨爲
關中楷範則公之所以種德立教者又從可知於爲政
也何有是應銘銘曰稽古草昧乘時取貴征討謀畫馳
轡餽餽器凶事危悖仁傷義身家不養心體劬瘁激倖
萬一珪組名位人爵之寵天道迺忌粵盛德者志不在
是天幸免死務本爲計養親修己力田享利獻羔醢酒

優游卒歲孝慈忠厚冠婚喪祭規撫長遠禮節密緻用
基作室後嗣是視鄉里善人耆艾昌熾子賢孫顯瓜瓞
承繼積厚發宏影響報施帝制官封國恩汪濊彼勞生
榮公則逸致全身亂邦起家盛世爲家令祖誕有所遺
創始之業勤儉是自雲初仰止毋或覆墜

奉元路總管致仕牛公神道碑銘

有序

世固有負碩厚博大之器處混一盛時爲天子命吏能
有所云爲不以疵類少壘躋致敬歷貴顯其才足以用

世而猶未大摠其蘊以歿者予於奉元路總管牛公有
是憾焉公諱誥字晉卿資簡重通敏有幹局幼業吏由
東鹽轉運司幕官久積資歷選掾陝西行省大德七年
授從仕郎尹華州華陰縣中書辟掾東曹十一年陞承
仕郎上都畱守司都事轉承直郎河東山西道宣慰司
都事丁內艱服除延祐二年仁廟遣使者分十道宣撫
天下公預選奏爲甘肅道首領官還朝改戶部主事遷
奉訓大夫大都畱守司事至治二年超朝列大夫出爲

甘肅行省郎中天子重民事慎擇司牧詔中外舉堪任
守令者公被薦拜亞中大夫延安路總管居五歲上疏
告老進嘉議大夫奉元路總管致仕國家政治天下仕
以吏進者多然他途皆迂入掾中書始官華要又在朝
百執事操履事爲少有可指摘則補外爲左遷今撮公
所居官凡八政自受辟中書六處幕職任皆繁重末守
延安位三品貴顯顧豈齷齪滯固乏才譖者所宜至而
公歷居之可謂曰能矣乎其佐幕則所至平易懇切折

衷衆議卒歸於正不忤物不阿媚利已尹郡則尚寬簡
務教養旌貞孝訟田宅者諭化之皆引去相讓可謂善
於其職者由是汴探公未嘗以疵類少躋蹟能有所云
爲而誠負碩厚博大之器矣然猶有所未大攄其用世
之才也公系出唐相僧孺之後世爲關中高陵人國初
占籍長安祖順以公貴贈中順大夫鳳翔府知府上騎
都尉追封隴西郡伯考大用贈亞中大夫僉中政院事
輕車都尉追封隴西郡侯皆愿樸仁厚戢景弗耀祖妣

關氏隴西郡君妣李氏隴西郡夫人配劉氏封同其姑
子男二景權蚤卒景衡國子生舍生女一適奉直大夫
監察御史柴肅孫堅兒公生以某年元統二年正月六
日卒於長安通義坊居第享年七十一歲其年二月十
二日葬長安縣金光門小郭村之原鳳翔府君之穆至
元二年冬景衡以事狀走京師介肅乞銘其神道予以
不文辭不獲迺演繹其梗概爲之銘曰士奮於時屬時
有爲孰不效忠慎密之資法令是師猗嗟牛公割裁設

施順理協宜克建事功剛不乖睽柔不詭隨佐幕雍容
贊畫勾稽不怒而嬉材敏且通典郡西陲越五周菁博
哉民庸教育撫綏勸貸賑饑易凶爲豐吏畏不欺老倪
懷思靡有瘵恫齒髮告哀引年知幾攄蘊未窮笑言熙
熙身康神怡福備而終體魄之歸安固于斯馬鬣其封
德業不隳視我銘詩用告臣工

西潭謝君墓碣銘

有序

澧陽謝君貴卿既葬之廿又九年爲後至元庚辰其中

子璿來荆請曰先子歿已及世墓道未有碣銘由璿客京久是以緩先子雖不試於仕其才使之仕寧後人其卒不仕命也夫君向職太史敢謹上事狀請銘請益廛且哀遂諾至元十四年江南初降下元帥呼必哩以兵臨澧陽淮安忠武王族子某別將騎三百由松滋來會昏暮失道憧憧阡陌間莫知所之君攜酒饌勞問別將疑不受乃大言曰公毋他慮某請送至軍中酒罷君持火前導夜半與大軍遇元帥方怪騎失期使卒緣道呼

騎亦呼以應卒見火白元帥元帥喜出迎別將與俱入
元帥詰所從來別將引君見曰全吾軍者此人也元帥
益喜以國字書及羽箭授君爲賞典徵俾持詣京帥授
官君不敢元帥多之元貞二年郡大旱縣民朱長五聚
黨柵巖險爲亂出肆焚蕩剽掠無畏忌吏捕輒被害衆
奔還投君乃不敢犯監郡塞甫丁率兵至順林驛召君
問計曰賊與民雜處今欲縱兵恐殃及無辜聞賊畏君
可往說降之否則君能自取可不煩吾兵授戎械俾自

召募君感憤率家僮及里中願從者直入賊穴悉衆與戰禽長五及黨與餘皆降郡欲援著令賞以一官君不自居其功且以野人不能官爲辭郡強之不聽朝廷嘗行履畝法郡欲盡稅荒田君言澧爲道要衝曩嘗被兵民今雖復業凋敝不能治田故多蕪穡且官兵頻歲擊五溪六詔日南林邑諸郡餽餉造舟澧民居多良田且不暇耕矧墾荒乎諸郡被兵者役繁且優免吾郡獨不當然乎迺投牒列訴郡是君言荒田遂不稅君既不仕

敦本力田貨用寢饒作石橋三曰漣溪曰順林驛獨漈
河當驛道未橋而君疾捐穀萬石屬諸子曰必成之既
成璽書賜名通濟民歌之曰水嚙我足謝君出粟伐石
爲橋我行逍遙及迎師教鄉里子弟歲水旱疾疫輒施
予貧病有喪者嗚呼最君行事其所以趨事應變除害
利民可逆睹也殆有協於勞而不伐積而能散之道歟
君諱安富以所居號西潭資雄毅通敏能自樹立大父
而上逸其諱考文彬妣江氏以宋端平甲午年六月三

日生至大四年十二月二十八日卒享年七十有八娶黃氏繼盧氏子男四人璧早卒琰某官璿某官琪某官女二人壻某某孫男七某某皇慶元年正月某日葬於澧陽縣順林驛之黃屯銘曰謝後申伯光奕葉之人世遠淪譖牒行爲矯亢非任俠辭避官賞豈萎荅戎伍鄉導殊不習賊巢馳突勇不怯荒田無稅口便捷石梁孔道利病涉我詩其善賁馬鬣黃屯之阡永熠燿

定軒先生張君墓碣銘

有序

澧屬邑安鄉士子張毅持其邑大夫前進士易漢懋所
述考定軒先生行實走荆南介臨功李君英踵門拜泣
曰毅不天先子葬已久墓門未有銘敢以是請按狀君
諱疾遷子敏其字上世經喪亂弗可譜其先處江漢間
諱宗政者爲五世祖仕宋末以武功授保義郎知安鄉
縣事駐兵邑之西渡家孱陵里遂占籍邑中君幼聰悟
能卓立生十三年天兵下江南北諸郡妄自賊愬君
蒙犯艱險奉親避兵天門山會父喪山中弟某方幼君

展轉護柩歸窆故里喪葬如禮制少不以顛沛損廬舍
燬蕩黽勉葺理卒還定安集式慰母心遂力田厚生讀
書以養德事親教子浮湛里社若將終身者或勸之仕
曰名教中自有樂地竟不出季父痴崖公嘗病篤君薦
粥藥侍之左右無方後喜謂人曰我疾之愈醫師之良
姪子之力也女弟適繡林鄭敬仲闔門遭疫疾親友懼
相染莫有視者君惕然曰同井猶相扶持況同氣乎奮
往省療不顧雖竟不能救仍治其喪擇師教孤子俾有

成姻親家有親喪葬既卜日矣其子惑術士之論聞君
有吉地欲兩易其兆君直畀之不少恡又姻黨孤子女
年及笄君教養具資裝嫁遣之鄰里貧病無告賑施不
責報人皆難之嗚呼君之德不既厚矣乎備孝友睦婣
任卹之行於成周大司徒教民之法蓋合云是可銘也
考諱良孫妣秦氏君生於宋景定壬戌卒於我朝後至
元三年丁丑壽七十有六比歿訓飭子孫索所歛棺槨
眎之曰三日後當與汝曹訣至期果逝其明了又如此

明年戊寅某月日葬于中興路石首縣東山之陽配比
干氏合祔宋進士耕道次女貞懿柔淑宜士人妻子男
四長即毅長教澧之溪東書院次某某皆蚤世次敬爲
郡庠師亦先君卒女二王佐金鼎孫壻也孫男五女四
銘曰嗟哉張君德備行醇生不逢辰沒齒於鄉里之善
人昭昭不泯猶幸其子之有傳

吉水州監稅謝君墓碣銘

有序

澧陽逸士謝西潭有子四人曰烏江長官璧順元鎮撫

琰知平江州璿其季即君諱琪字君璋資明達疏敏有
幹局大德間順元蠻作亂朝命行省調兵擊討役湖北
諸郡民饗師黃平府有司計租畝第轉輸糧數多寡西
潭戶應輸為石者一百遣烏江督丁夫代行漕去大軍
三千餘里道路舟湍瀨而陸巖谷篳簹艱危險熾大暑
疫癘方作死者什八九枕藉於道君慮辭情慷慨即以
糧如數授君輸之返遇烏江於辰陽盡糶其糧以輕裝
歸軍食既給且私有贏利數倍其應變類是西潭老不

預家政皆委於君西潭卒烏江繼亡子幼順元平江仕
於外君家素號郡中多田諸房公賦徭役金穀出納歲
時冠昏凡瑣屑之務悉賴君以理周致咸有法度內外
無間言尤好賓客暇日則弈碁投壺置酒食為笑樂尤
能憂人之憂周急拯危難施貧民病者藥死者棺槨西
潭遺命作石橋泔河利行人君輔諸兄力成之是謂家
之能子矣初西潭交故湖廣行省辦章靜山程公最善
嘗遣君往謁程奇君應對欲用爲從事以未得命西潭

辭程不能強嘉其孝遣歸之播州楊公薦爲軍民長官
亦以侍親不就大德辛丑歲大饑出粟若干斛以濟授
江州路平準庫副延祐初改吉水州監稅皆不赴曾大
父思武大父文彬宋民兵統制父即西潭君諱安富君
生於至元辛巳卒以延祐己未得年三十有九配吳氏
後君一月歿合葬於澧陽縣順林之原去祖妣江氏墓
百步子一人庭實能自樹立今官漢陽之馬影湖孫男
二基塾尚幼既塋之廿又三年爲至正改元庭實持事

狀請銘遂銘之曰在易卦蠱曰子幹父承考之吉善繼
用譽一家之政施于孝友豈必居位為政可取侃侃謝
君克協斯道名宦不急惟養是顧惜材弗施仍嗇于壽
上天孔昭克昌厥後

鄉貢進士翰林書寫楊君墓誌銘

至正元年四月聚由陝西行臺都事遷翰林待制中書
命下翰林遣書寫楊君惟肖持璽書駟召聚於山南閨
五月癸卯戒途六月己酉病暍卒于安陽彰德路總管

王侯仲方哀之帥其屬藁殯城下七月丙子朔訃至澧
君二弟惟紹惟善不敢遽告其母父知之命惟善來山
南問卒故明年夏遣惟紹護柩南歸因遂走京師致書
及狀乞銘其墓嗚呼不文其忍辭銘哉君生有異兆資
穎悟幼工屬對六七歲誦諸經不忘即能賦詩稍長補
郡學弟子員月朝十五升堂會講進退揖讓有度發明
詳盡衆賞其超拔弱冠師蜀儒呂仁叔治春秋讀書不
釋卷夜分方寢家務妨奪則頻顙歎怨泰定三年遊京

師從故翰林直學士文安謝公學易文安于君為中表
丈館於家日與之議論君聰敏卓朗且接賢士大夫多
學益恢拓龐肆奎章虞公伯生中丞馬文貞公我先兄
祭酒正獻公俱憐其才薦諸朝不報至順三年以寓士
就試上都名中第二癸酉會試京師適文安考文君自
陳避親嫌不試停三年君念親老未獲祿養迺以善楷
書試補翰林書寫中高等官制書寫歷三考始官七品
時科目暫輟君將有所待比復賓興而君卒矣惜哉君

居家孝友慈厚易直遇事通敏先卒一年文安公薨於
位子搢幼君經理喪紀咸盡其道請於上官得告舟具
喪歷涉艱嶮歸窆於鄂士論多之適權臣當國予備位
臺諫君貽書數百言以忠讜見責觀其行其氣若是豈
後人哉初至元二年君暫歸省已乃挈家北上侍婢溺
死彭城舟中旋至京妻魏以蓐難殂衆固閔其否於前
而期其亨於後也君卒時適大暑奉命南邁將遂過澧
覲省且就試秋闈武昌迤三駟不以疾少緩過鎮陽病

愈熾渡漳水委頓至安陽城北門下馬憩道側氣絕安陽民以使者旅死紛紜來視將數百人會城土半摧狀若巘觀者駭愕震蕩巨擊鬼磊隤墮壓死者二人壓而不死目損者一人股折者一人噫是何氣之蓋而值之者暴也君字與似生於大德壬寅卒年四十世為蜀遂寧青石縣九節鄉人先世避兵難出蜀再徙澧陽之新安遂家焉曾祖某宋某官妣龐氏祖考震卿宋鄉貢進士祖妣丁氏父幼學隱於仕母宋氏妻魏也子一人勛

國子外舍生以年月日葬君於某鄉某原先塋之次君
來京師有詩文百餘篇余裒輯傳之餘皆逸銘曰嗟楊
君志不展賢能興備俊選學行懿年命舛生有死疇克
免惟之人憾不淺殞道路親在遠子違養孰免跣賴有
弟輻車遣窆安固時日善文若名流廣衍死因傷生可
唁語若翁淚莫泣勛世學後將顯

桐鄉甘公墓碣銘

進義副尉澧州監稅桐鄉甘天麒以其考梅山居士葬

有日走書京師致里士韓天祥狀丐文其墓銘按狀居士諱茂源字泉甫邑之蒲村人考澤之妣程氏歿繼程氏居士配王氏甄氏子男四人霖早世天麒以翰粟再調今官

闕

天驥女三人妻吳某陶某戎某孫男五應

龍某某曾孫男三造某某居士生宋寶祐戊午至正壬午九月廿有九日卒享年八十有五王氏先卒廿有二年享年六十有五以某年月日合葬於其邑白雲巖西倉基山之原銘曰帝元弔伐武南國趙山將燼假喘息

北淮南江兵難棘流播萬死生僅一桐為舒邑當其阨
伊人轉徙困頽頽易代來歸年甫廿孤惻業農卓自植
耕食_去織衣_去勤勵飭天性儉樸不躁迫孝奉繼母怡
顏色善化里黨弭訟閱攝鄉三老別淑慝逋復賦集蕪
歲闢都鄙新造事叢棘政理繁賴左右力居家冲約睦
宗戚凶歲發廩損厥直遠道輦負仍給食高年康寧恒
肅客冠衣期集娛暇日程督奴僮事藝穡孫子詩書紛
有秩伏臘羔酒樂孔碩起家之祖理所必憂勤於始老

則佚考終厥命固窻窻易著餘慶由善積我詩行之琢
貞石後昆構播蔭可席

河內李氏新塋碑銘

中順大夫江西湖東道肅政廉訪使李君守仁以予昔
僉山南憲事有同寮之好致書一通俾其子本持先世
行實拜請曰吾大父暨吾考葬覃懷城東故市地卑弗
稱改卜兆域襄事將樹石新塋以彰潛德敢蘄子文予
以契誼不得固辭按狀君大父諱承祖字繼先生金泰

和乙丑世為河南大家居鐵器市其先葬洛陽舊城東
二里許瀕伊洛有良田若干畝第宅園圃邸肆之業畢
具金叔世兵亂族屬流亡大父播在草野晝匿夜出米
拾以代食邂逅寇掠隣死者數大兵南渡轉客河內河
南平定還視故里焚毀殆盡田宅入勢家度不能復有
乃返河內時土曠人稀固可厚植恒產而大父猶豫者
猶心於洛也久而始占籍覃懷定居授田數十畝躬勤
儉率下耕作輸公稅粗給衣食仍訪得族子若孫三人

上黨掾還周致俾之成家大父敦篤仁厚鄉里尊敬前
至元二十九年卒壽八十有八以守仁貴贈亞中大夫
懷慶路總管輕車都尉追封隴西郡侯配王氏繼汪氏
壽亦八十並追封隴西郡夫人子男一人諱德字德甫
是為守仁之考以子貴累贈嘉議大夫禮部尚書上輕
車都尉追封隴西郡侯女五妻劉某韓某樂某楊某者
王出也妻田某者汪出也孫男一即守仁曾孫男二本
御史臺察院書吏朴浙東海右道宣慰司照磨玄孫男

四士潛士濬國子生士渙士淵就傳肄業女二幼在室
禮部資奕朗磊落美風儀質直簡重不妄戲笑弱冠治
家致殷阜製物尚堅朴不喜華麗儉素自奉待賓客必
豐裕民某氏嘗從貸錢數千緡後貧不能償毀券以貫
里民王甲貧粥幼子公家十餘年撫養成立甲死其妻
無依公歸其子以養家奴陳興持錢若干遠服賈遂逸
不還公闕公畧不追訪稚耆凍餒者調恤厘至丁壯行
丐則斥之民有訟或嘗求直輒開曉以理慚服而退其

賢而好義蓋出天性生於我朝辛亥卒以至治三年癸亥配里氏卒於泰定甲子累封隴西郡夫人俱得年七十有三河內縣某村某原為新塋大父而下某年月日從昭穆葬禮也初大父刻意教子孫妣汪氏亦訓之曰語有之家無讀書子官從何處來大父曰吾聞積善之家必有餘慶吾家奕世清白未嘗有為不善者吾值罹艱厄河南北甫定勤苦成立若等能習儒向善後豈無昌大者耶克繼其志延致郡名士五子有誘掖訓誨故

憲使君為學讀書究法律練政事卓然樹立由郡曹薦
吏山東憲司貢補察院別掾御史臺中書省贊幕漢中
燕南兩道肅政廉訪司拜陝西行臺御史就遷為其臺
都事擢遷湖南憲司召拜內臺監察御史中書省選為
右司都事超兵部郎中御史臺復奏奪為都事歷山西
浙西淮西三道憲副今為江西憲使最君筮仕迄今所
居官一為宰仕一為兵曹自餘歷風紀之司者內外臺
八道廉訪司雖清慎積階致然不曰祖禰培植之厚教

督之嚴能若是乎故君于改紀北石未嘗頃刻外於念慮亦孝矣哉嗚呼使大父無河南之難洛陽之田宅不廢後昆未必如此其盛且大父母期待君何敢必其顯達徵之古今天人之理否泰消長之機不少乖也是應銘銘曰國有屯否景運斯興家道盛衰亦曰迭乘時古時今岸谷谷陵蕩析離居生生是承猗嗟大父履危臨兢燎原幾熄紹於燈燈禮部繼之焰熾以增允矣孫子仕版載升喬嶽之崇鷲翰之騰揚名顯親孫子之能吉

竊維安體魄依憑天人理微千載可徵

奉元路總管致仕文公神道碑

是篇絕筆

公諱如玉字璋甫宋太師潞國公彥博之後五世祖以仕入蜀家順慶之南充縣曾伯祖而下由科第仕者七人理宗端平三年丙申闔族避天兵南下君考某獨不去隱居生二子其長讀書力學倜儻有用世志試吏擢掾蜀憲以公事至京師上書謁某官王某薦於故丞相順德忠獻王王器之未及用薨公還補四川行省宣使

右丞廉安道重其材請改為掾至大間書滿授承務郎
陝西行省都事省臺交稱其能留之在職凡六年陞奉
議大夫雲南行省郎中擢朝列大夫四川行省理問官
平章囊加解剛戾以公不善迎合攬拓細故言於朝置
不問遷湖廣行省郎中未赴囊加解阻命弄兵檄為敘
南宣撫使稱疾不行責其遷延顧望公卒不起事定朝
論躉之進中順大夫順慶路總管時榮其典鄉郡以比
漢朱買臣築亭於故里扁曰處鄉以示微意視事後就

居城北屏僕從杜私謁興學教士禁賭博汰侈靡化民易俗月餘豪猾斂避皂隸蠹政者稍徙去為他業南充闕令西臺御史張弘道時主岳池縣簿公察其人幹敏可用舉攝令決滯獄五十餘事囹圄遂空貧死者無所於歸往往寘骸骨僧舍巖穴間命弘道度地瘞之里俗上元伐柏構燈樹歲數千株小民急迫每盜斫墓中木公悉禁止不敢犯敬神愛民歲不飢創二亭於東山者曰大觀果山者曰紫雲與士大夫登覽今為勝槩四年始

代去年未七袞致其仕遂授令官謂所知曰吾願足矣
平居教子侄書不去手歲時偕親友遊眺飲奕自娛以
終天年至正二年二月十六日薨於正寢其生之年則
至元丁卯享年七十六歲祖考某贈中順大夫廣安府
知府上騎都尉追封鴈門郡伯考贈亞中大夫慶元路
總管輕車都尉追封鴈門郡侯祖妣某氏封鴈門郡君
妣某氏封鴈門郡夫人公前配楊氏繼夾谷氏俱封同
其姑子男一人允中楊出也廕某官女孫二長適喬克

誠次幼以其年三月某日祔葬於某之先塋六年春允
中來京介雲南道元帥舒嚕存道持里士馮百藥狀以
予職在太史泣拜請銘其墓道義不得辭今槩觀公行
事豈庸人哉在陝幕也妖僧作亂奉先屬邑省臺聚議
計無所出公意氣閒暇操簡牘布置行遣馳報朝廷檄
郡縣召募丁壯據守要害移文省臺大臣率兵出鳳翔
盤屋分道討捕尋生擒之戮首惡罪餘黨盡釋星誤者
公之功居多初城中駟吏恃勢頑黠公嚴條治之使者

始獲餽膳供張之奉關隴大侵公往賑恤有術務活貧
乏富者不得冒給在雲南建言烏撒屯兵不利宜州縣
犬牙制之勢分權削可無後虞事聞命省臺樞府及公
雜議衆是公言未報歲餘果叛屯兵千人盡沒咸服先
見諸侯王王禪孟夏出畋於霑益州省憲祖餞於郊王
飲公酒因言曰天子以王仁愛命鎮撫邊陲今二麥將
登遊獵非時王曰業已出胡不蚤言之然當嚴令約束
不使有所擾翌日罷獵而還賜金酒觥以賞之丞相亦

耳吉尼恣橫不法公數諫止不聽由是怨之百計中傷
竟莫能加害移文中書誣以專權廟堂直公奏調理問
以解避嗚呼以公之才之氣儒行吏業倚以治民何有
不可哉顧用之未大故功施於世也淺而復傷或尼之
沮殆命也夫所居仙門鄉相對有礪峰頂石如冕者世
稱石官人山遂以石山為號公薨石亦崩焉其文賦歌
詩號石山集者凡若干卷藏於家

銘辭逸

燕石集卷十四

欽定四庫全書

燕石集卷十五

元 宋聚 撰

行狀

故集賢直學士大中大夫經筵官兼國子祭酒

宋公行狀

曾祖逸其諱

祖珪贈中順大夫祕書太監輕車都尉追封范

陽郡侯

父楨忠翊校尉衡州路安仁縣尹兼勸農事贈
嘉議大夫戶部尚書上輕車都尉追封范陽
郡侯

公諱本字誠夫初諱克信世燕人至元十八年辛巳生
大都為美坊二十年戶部公出為杭州東南隅錄事判
官公受句讀於杭士石厓何天麟即聰悟可喜二十六
年戶部公遷歸州興山縣主簿公隨侍之官縣荒僻民
頑陋僅百戶無師友公閉戶讀書學皆自得大德三年

戶部公秩滿出寓武昌貧不能謁選五年改江陵路平
準行用庫提領須次未上公始終其間聚徒獲束修以
養六年侍戶部公赴官平準俸薄公聚徒養親如武昌
時兼教其弟息州都監克敏及襲傳性命理義之學於
慎獨先生王奎文昌甫以俊秀子弟補江陵路儒學弟
子員學業精熟才器通敏為憲使陵川郝米麟文徵所
知將擢為憲掾會亮公不能求知他人遂輟薦或勸從
事學宮階是獲職教一縣公亦不答十一年戶部公薨

欽定四庫全書

燕石集
卷十五

藁殯江陵母范陽夫人年且老戶部公歷仕南土雖二十餘年小心謹畏家素乏蓄積公至是孤益貧苦殆無以衣食喪祭哀戚之餘教童子七八十人講授紛沓親理衣鹽雜務苦心力學不以寒暑晝夜作輟當食亦置書其傍披覽研究不覺匕箸之及口飯羹數冷溫而後進始得終餐夜分乃寐幾廢寢食至大二年故易水何公瑋仲蘊平章河南行省經理屯田至江陵公聞何賢且故太子贊善靜修劉先生之友上書請見何才之憐

其貧親未歸葬謂郡守趙嘉郁文卿曰瑋不才備位大
臣素志求賢報國茲行得郡二三人今復得宋乃貧若
是汝盍資之奉父喪挈家易水上讀吾所蓄書告諸子
學然後薦而用之盛德事也趙諾而助遣之三年服除
單騎北上至南陽聞何薨公曰吾所以行者將謀葬與
養為存歿計爾今所依者亡吾益浪將安之復歸江陵
教授不輟貧益不自振處之益安學益富而德譽日益
隆矣皇慶元年憲使李彥從周熟公才諳薦為河北河

南道肅政廉訪司掌書客汴久不樂去省母時仁廟詔以科舉取士公曰朝廷待士如此吾志決矣河南司憲凡四檄辟之竟不赴延祐三年范陽夫人棄養權合葬江陵六年挈家北還名動京師故西臺中丞張文忠公希孟文章德業負一代重望時為禮部尚書見公著述大奇之日與議論如故闕舊命子惟健從之游錄公著述移文吏部乃騰章上中書薦試館閣之職吏部以科舉方興不肯官儒士之由他道進者為辭張復三移

文曰科舉所取皆時文宋某所述乃科舉所未有乞移
文翰林考覈用之竟不許張怒曰何天官泥法之如是
宋某豈終不用者邪七年英宗即位大魁大都鄉試至
治元年廷對為天下第一賜進士及第宰相命京尹給
儀衛騶從導至所居實自公始授翰林修撰承務郎同
知制誥兼國史院編修官預修仁廟實錄辭直而不俚
時英廟製鹵簿舉親祀禮翰苑製撰紛冗公初由甲科
入館職雅為學士元文敏公復初侍講表文清公伯長

所知命公當筆者十七八公平昔記問該洽才情精敏
行詞務溫雅宏麗不敢苟簡毫髮加以都人士及同年
爭欲公文章公答應筆翰如流故是歲時文極多自是
士論翕然愈歸之明年冬安南國遣陪臣賴輔主等朝
貢回以本職充館伴使至武昌適重修晉庾亮南樓落
成行省平章某欲公文記之然素不號尊賢禮士挾貴
而重於致辭微使人諷公啗以潤筆錢若干公艷然怒
曰彼縱妄自尊大獨不能遣一僚佐請邪遂不記公時

雖居散地然靜動云為嚴毅方正有識覘其器局非淺
淺者泰定元年春拜監察御史階承德郎公念布衣叨
恩驟進六品秩恒以報効自期至是盡忠論列不事苛
細按劾所言皆王綱國體逆賊特克實等雖伏誅其黨樞
密副使阿薩爾身先弑逆後乃告變朝廷以功掩過恬不
加罪公上疏言其罪絕滅倫理後雖有莫大之功舉不
足贖乞早正天討太廟失仁宗神主盜久不獲公上疏
言在法民間失盜應捕人等違限不獲猶且治罪乞重

罰在京應捕官員及太常禮儀院官中書宰執視事不
常聚散無度日趨禁中有無旬不至中堂者僚佐曹掾
恒不得同堂議政公上疏言其偷安苟容壅滯機務刑
政差池紀綱紊弛乞戒飭臣僚自非入直宿衛日期須
令日聚公府以決庶政俱未報在位僅閱月改國子監
丞時晉王初即位從來者皆椎埋無知獷悍豪橫無所
於歸或百十為羣剽劫殺人恒州道中事覺逮捕右相
旭滅傑奏釋之戌北邊蒙古千夫長使在京邸朱尚醫

妻女偶道過邸門外千夫長及從者自車中白晝奪入
朱泣訴宰相曲庇置不問民間憤怨會風烈地震有旨
集百官雜議弭灾之道公卿枚舉他事公獨言特克實餘
黨未盡誅及仁宗神主未得恒州盜不治朱尚醫冤苦
莫伸刑政失度昏弱之甚灾異之見職此之由辭激氣
憤涕淚橫集衆俯不能答獨中書平章政事公撫按亟
稱之今朝行間有及見之者是年冬進兵部員外郎奉
議大夫國家幅員視古為廣要荒州縣赴京師動涉萬

里因定制四川雲南福建廣南西五道三歲一遣官廉
慎有幹局者詣所隸行省偕行臺監察御史注擬三品
以下官比奏聞降制勅先遣赴上是歲適當銓朝堂久
才公俾分典福建銓福建八路瘴癘少地富庶善闕什
六七或可以賄取公一以公道處之向任惡闕今優之
善闕今補以中下稱提銓擇遏絕姦弊人法並用得黜
陟宜二年還朝轉中書左司都司奉政大夫今湖廣行
省叅知政事段轉由為太常禮儀院判官奉堂帖發粟

賑河間飢民多粟少段擅發歲飼官馬馳芻粟鈔五百餘錠以足之宰相怒欲加罪公力言曰某向由江浙還都道經河間民禠榆樹膚以食今猶可驗且民七日不食則死河間去都往返八百餘里比得請無及矣段能如此是可褒者何罪之有衆善其說迺罷三年當大比之歲同考試大都鄉貢舉人取士精當汴處士吳炳彥輝有德業才學望譽甚彰行省奉使司憲雖嘗俱以名聞至是公力薦奏以翰林編修徵之時天下州郡荐

歲水旱行省及守臣往往不暇稟命於朝擅發廩粟先賑後聞宰相患之奏自今天下雖飢遠方州郡果見餓莩方許權宜擅發其他雖飢而未死者不許勅準議移咨行省主章掾李彥國英署牘至公公初不知愕然曰安得有是如此則人皆懼擅發罪過飢須稟命始賑民盡死矣不可入覆中堂宰相曰已得旨奈何公感額慮久退謂彥曰茲事必不可行欲覆奏則宰相不肯無已則有策汝能從乎彥曰謂何公曰毋白宰相但尼是牘

彥徐曰公官彥吏果罪廢格公重彥輕公能負罪活天下民彥獨不能從乎但堂帖已錄是勅付御史臺臺必已檄各道廉訪司如此則事必彰露且無益公曰吾思有以處之退詣治書侍御史王士熙繼學陳其事王曰吾猶能省臺檄各道廉訪司公牘已署未用印若論甚善吾亦為若尼之遂果共尼其牘未幾有赦彥賀公曰可以免矣公一念忠厚有陰德天其祐之耶公之為民不避禍也如此先是鬱林州蠻寇作亂嘗命故將家子

李某假兵部尚書從諸主帥兵討之李在道納妾逗遛不進兵敗歸宰相猶欲巧庇為之改官公力爭止之冬十二月十九日昏時俄中書遣人召公議事至則已燭宰執以下皆在公不知何為平章政事諤卜都拉謂左司員外郎胡某曰適所奉詔藁可令宋都事觀公始知明日欲降詔赦蓋左相都爾蘇當國得君及右相達實特穆爾是日同入朝而奉旨作藁命中書奉行者大率謂自朕即位以來法祖畏天故北藩叛王輯睦通好南

荒酋長諸蠻夷酋長多降附入覲皆天眷也然邇者星
孛地震列郡水潦將由愛民之心未普致上天垂戒耶
抑或獄濫而淹延不決或累朝人嘗中獻諸物而未酬
直或諸嘗有過為憲臺奪官欲復求錄用而不得是二
者憤怨致然耶其大赦天下酬累朝獻物之直命中書
省錄用自英廟至今為憲臺奪官者其餘前後得罪者
非臺臣不得詰治其實皆都爾蘇姦邪罔上納賄要譽
之計及諤卜都拉私議而共成之者公色變覆於宰執

曰舊制草詔須翰林曾遣召否諤卜都拉曰無事翰林
茲蓋兩相親草已經御覽有旨勿令衆知吾黨不敢文
又不敢增損不過譯為華言而已毋復他論一夜譯成
宰執將起罷公前立抗論曰本雖漢人居末僚然享爵
食祿恒思報効有所管見不敢不陳嘗聞醫者曰人病
脉不病易治脉病人不病難治以人譬國紀綱法度脉
也安有朝廷降詔大臣不知之理此繫紀綱法度紀綱
法度一亂是脉病也失今不治後不可療且即赦文言

之尤有不可今警灾異而畏獻物未酬直者憤怒此有
司細故不宜上撓宸衷是乃王言宣布則必貽笑天下
又云諸嘗有過為臺憲奪官者命中書錄用後復有姦
邪賊穢者朝廷將治之耶置不問耶且自即位以來屢
以仰遵世祖皇帝成憲形於詔旨不知世祖朝嘗錄用
奪官者否豈非自悖前詔耶又云止錄用英廟至今奪
官者既畏憤怒當均蒙錄用其在前後者何故不與本
言果可采乞大人詳議明旦同白兩相猶可及也公再

三陳請辭情懇切諸相不能聽起罷明日竟降詔赦數日公稱疾不出四年春將滿告當會試天下進士中書強起公為考試官勉從之未踰月改禮部郎中朝列大夫條上文獻事宜凡七曰國史院倣前代制度增撰志傳曰改試國子生曰選試國子正錄等職曰國子助教各治一經曰各路設儒學博士用進士為之曰用會試終場下第進士為儒學教官曰采錄天下士人所著之書分等第而用其人法度周密條目備具時雖未暇舉

行衆莫不歎其言之善天厯元年文宗即位冬十二月
陞吏部侍郎中憲大夫職掌皆銓選錄用薦擢封廕等
事比者胥吏弊滋公素所聞知視事月餘條舉十餘弊
嚴禁約之衆稍為肅二年秋當大比而禮部闕官堂帖
以科舉事重不敢失期命公攝禮部事閱月真授禮部
侍郎中議大夫不旬日天子初置藝文監拜太監兼檢
校書籍事東海餽運舟至選三品清望官祀海神天妃
南方命公函香幣偕翰林直學士布延寶哩往使嘗歲

多憚遠涉往往中途歸公徧歷閩浙往返半歲三年恭
上欽天統聖至德成功大文孝皇帝尊號奉旨同奎章
閣學士院承旨學士李洄書篆玉冊寶文禮成改元至
順進奎章閣學士院供奉學士亞中大夫時方修經世
大典撰分書局公纂述夏官政典凡若干卷編摩緻密
事備辭嚴孔子父母已封啓聖王王夫人獨鄆國夫人
元官氏猶仍舊號由公建言降制加封為大成至聖文
宣王夫人二年冬憲臺以公忠謹向居言路不久且無

圭田之養俸薄清苦奏為河東山西道肅政廉訪司副
使中大夫方治行改拜禮部尚書公嘗一為其部郎中
一攝行部事仍留為侍郎凡制度典禮之事援引經史
條例揆度事理物情剖決精允無復滯礙命下僚佐胥
吏皆喜其來三年復當大比行省及各處主試官俱致
書幣京師禮請館閣之職為鄉試考文官公隆厚其禮
節敦請餞遣濟寧路總管徐某嗾曲阜孔氏家長元祚
攬撫襲封衍聖公微過上諸禮部公怒躬操符文責之

曰衍聖公國家所重聖者子孫縱有過差亦當百世蒙
宥元祚者正當修己齊家以德率下自然外內睦婣大
小從化且所言之過假有實跡亦係赦前本路輒聽其
訟實傷風教未幾衍聖公薨公告諸省臺館閣咸遣使
致賻奠禮四年正旦時大行皇帝上仙今天子未至將
循故事舉行朝賀禮公曰朝賀為誰然天下不可一日
無主止宜上表皇太后不可朝大明殿朝廷從而廢禮
二月當會試天下進士中書命權停以俟新君即位四

方士多貧不能久客以待咸欲舍去公力請曰會試乃常事不奏題不廷對何以俟為且進士一舍去四方將以為廢科舉矣遂追用三月一日開試公實知貢舉初科舉條制有云天下選合格者三百人赴會試內取中選者百人槩言之也由前知舉官泥條制之人止憑赴會試數中三取一故累舉中選者恒不及百沿襲至是舉會試進士亦不及三百公持論堅請取中選者百人實自公舉始六月今上即位上都八月還京九月廷試

進士公又奉命充讀卷官自科舉之興兩榜第一甲只放一人公舉前代典故白宰執闕放三人亦自公陳請始會試廷試罷皇太后及上聞之皆喜各兩賜金幣寵勞亡何復降制兼經筵官元統改元拜陝西諸道行御史臺治書御史疾未赴復留為奎章閣學士院承制學士仍兼經筵月凡三進講公講解明坦且陳告懇切上嘉納時降寵賚三年夏改集賢直學士大中大夫經筵官兼國子祭酒時公氣體已羸弱力疾視事稍閒猶至

監大槩一遵至元所定學規薦補貢試教養之法間有
微弛黽勉繩飭之冬疾有加寢不可救竟以十月二十
五日薨享年五十四歲中書省御史臺率六曹各寺署
及國子監致賻禮給喪葬朋舊同年洎兩舉門生國子
諸生哭祭柩前者十餘輩執紼者將二千人以次年四
月十九日壬申葬宛平縣香山鄉樞山原新卜之兆祖
妣張妣李配王俱封范陽郡夫人子男一人誘女二壻
杜儉尚軌皆國子生惟公性高亢孤介尚氣不屈不與

人苟合安交遇事機警識見超卓幼負甘苦讀書績文
務為古學致心悻氣海寒疾事父母孝弱冠以來凡為
童子師者垂二十年獲束脩以養三十猶不能娶不卹
也操修端潔奪擢巍科數歷華顯致位三品使天下稱
願不啻不貽羞辱且累奉制書褒贈二代恒以考妣權
葬南土為念幼侍諸兄同筆硯怡怡膝下讓弟克敏席
戶部公世賞為征官教養有成薦補兄子彊為國子生
由侍儀舍人調安慶路桐城縣尉京官俸薄猶時割祿

米遺親族貧者交朋友厚或有干請既諾必誠篤周致
不遂必以誠告之不敢欺誕事不可為則徑情答之當
官處事守正不徇故亦有不悅者人有一節善則極口
稱道居要路汲汲援引同年及名士尤善延用後生才
俊素不善飲然遇讌會能談笑歌咏與衆歡洽人多親
慕願交臨事嘗思謹守法度不敢踰越視吏牘往往親
改竄若嘗練習然法外意間有世俗所不能識者慮事
周密務當理而可行視所當為則勇往不知有推避巧

術左司吏部實權要之地歟怨獲譴甚不易處公廉貧
自守防閑有道家人恒告不足公處之淡然疾惡之心
重頗好直言正色當公府議大政事及私居朋友辨論
雖勢軋其上情牽於左右公嚴厲抗辭略不少怵避
衛道之心甚切凡以儒立身或細行有未至公規戒彌
縫不使世俗非笑孔氏顏孟氏子孫凡為教官隸禮部
銓擬或他事在所司曹局中公見姓名既撫諭成就不
使淹困連蹇一預鄉試一為會試考官一知貢舉一充

廷試讀卷官考校精覈不事雷同始終維持勝處家事
恒恐斯文之不崇重也性好著述會粹凡四十卷以登
科之年號至治集文章以氣為主貴立論尚微辭辭語
典麗豐碩溫厚峭健各得其宜尤嗜駢儷樂府嘗患二
者絕學規規然必以中繩墨諧律度為念而不失雄渾
寓南中時自號江漢羈傖性樂水及漁又號垂綸亭主
人嗚呼公氣稟清淑學得心傳成立艱辛蘊抱不淺夫
何位沮於壽設施不終奚止私憾於一門實士大夫所

共惜顧其操行履歷立功立言賴同朝公卿所共聞見
然裴在同胞中從之久而知之詳誠不敢溢美竊譽獲
罪公論謹狀公行述率孤哀子誘再拜乞銘惟大手筆
矜念情誼勉副懇託辱賜之文以光幽潛則存歿不勝
哀感元統三年正月日弟翰林修撰裴謹狀

傳

王程子傳

河南王某至元間從鄉人五六輩商於海表始踰嶺邁

疾他商以道路故無良醫藥不即治欲偕行則海俗病者不得居舶上羣議棄王山谷間遺米斗許洎炊具俾自飪粥囑曰幸萬一愈即晨夜倍道尚冀追及吾輩故逗遛以俟若若無憂五日不至期七日計已登舟毋來追語已舍去山荒惡寥聞無居人平人殆不可一日處矧王病罷憊不能爨欲扶掖起爨又不得火餓垂絕有羣猩來數數闚視一牝猩掇果實以進蚤暮存問撫視如人然自是餘猩皆不顧惟是猩如初閱月王以不火

食得差欲追前商迷失道且過期不能及猶豫久之猩
來挑欲與之交王慮不從恐召其類來加害強從之生
一男子將子同歸猩不許逃又不可後三年他商返曰
必道王病所毋相倍也諒已物故當收骨歸其妻至則
故無恙仍視舊神氣有加各相勞苦流涕嗚咽不自勝
既而喜指猩子示衆且道其由遂設詐避猩挈子取他
道出還至鄉里尋卒無子猩子嗣今居某里世業脂粉
治生形貌體法無異年若干娶某氏又有子至治元年

予來南聞之淮東府史洪濤濤聞之彭城賈氏子且嘗
見之王氏父子名不書諱之也論曰記禮者曰猩猩能
言不離走獸人自人獸自獸可與之偶乎王氏不得已
也彼狂亂之王迫辱姬媵令與羝羊交視其生子何如
者獨何心歟古所謂無外家者程子殆似之然王族賴
此以祀傷哉

劉廷讓傳

廷讓武平人父詳卿典史永平之遷安縣滿秩兄喪遽

去還鄉里留廷讓母子縣中戊辰之變九月六日東兵
奪瑞州遷民鎮將西掠北平漁陽人洶湧逃死無所讓
家素儉無孳畜車牛母王良家子步不喜遠妻姜且病
母弟及一兒皆嬰孺廷讓窘迫惶懼顧念闔門坐視死
出走中途遇兵亦死等死出走猶覲幸萬一免死迺奉
王出走姜狼狽強隨行讓左抱兒右扶持王王負劍其
弟以行久之王困憊曰癡幼為累枉被剝劫盍舍之讓
從而棄兒道側襁負弟王遂獲倍道兼進同伏匿山中

竟與俱免兵退業已無所於詢棄兒存亡始長嶺峰村
民高甲偶見棄兒持去至是訪還縣人感孝義報施之
道白令荆鳳舉以事聞朝廷旌而復之讓字守謙避兵
時年十八論曰人孰不曰讓是舉方之伯道竊有說焉
度不兩全而舍己子固同攸則出已見能自斷待王諭
而始然讓以母故義不容棄弟已死苟狠戾不顧以恩
掩義棄綏存兒世亦未如之何而攸當日興言及彼此
亦攸視讓為難讓雖未達前史徽纒之戒寘諸道路幸

有生理亦顛沛之仁亡存失道天豈負焉此千載而下
愈重攸過也母王視其子之棄孫亦忍哉

張才子傳

才子諱惟賢字仲容河南鞏縣人江浙行省叅政效中
之子性超朗俊邁有崖岸孤介寡諧恃才不妄交初名
曾父兄更今諱以廓其量稍知學即苦吟博覽強記百
氏之言悉以為詩知所宗尚汴流晉宋齊梁間富麗清
婉則主唐慕李商隱效之音節風調肖似搜抉研揣曲

盡思致必游心冥漠漸剔疵類然後已毫髮不憚不肯
示人故句律意度不凡流輩罕及作字遒勁有法善行
草從親官遊數往來湖湘浙樂佳山水嗜奇勝師錢唐
金蘭室得名士則不忍舍去所與遊者汴則徵士太史
吳炳江夏則文學博士吳涉延祐末京師太學生六館
生不下四五百才子每與月試賦有錦聲時文治日
熙海內學士大夫雲集輦下才子締交愈不苟篤契誼
者僅數人執政王公繼學儀曹馬公伯庸名鑒裁當世

咸契重才子新製一出嘖嘖不置口才子亦不自矜或
拉其投謁輒戲額掉臂去不事容悅苟合流俗莫之知
久之應鄉貢進士舉不中游吳中親且老而急其仕屬
河南憲府辟為掾勉從之使以下咸禮敬不以吏待泰
定元年入補家令司令史未幾轉禮部令史才子素以
清簡自處而寺署曹局猥冗叢脞疇接撓敗人興趣每
忽忽不樂且少讀書致心疾居常羸瘦重以不得志於
科名恥操簡牘事公府恒刺促自憤恚形於篇章竟以

是病卒年二十九寶泰定丙寅也嗚呼以斯人而斯壽
斯位天乎惜哉兄惟敏字孟功清慎能官今佐汴省幕
府才名尤工詩弟惟則字季通聰穎亦早世有子娶趙
氏遺腹子某集若干卷藏於家論曰詩三百篇後極盛
於唐中州江左率昧趨嚮本朝作者固夥而才子能知
所主亦卓越不羣矣前代設草澤文詞清麗等科人才
間由是進使才子生斯時取高等必易也豈復歎其
不辰彼以綴緝進躡清望授以筆札他無所能徒睢盱

愴怳自失其視才子賢不肖為何如噫古所謂名者在此而不在彼才子之名其可謂稱情也夫

跋

書揮涕集後

揮涕集一帙凡五卷杭於潛謝君堯章錄其所自為大母考妣壙志祝文洎哭二弟詩及一時才大夫士所作哀辭挽章思親堂罔極庵記若銘詩題咏也觀是編知其人孝弟且賢矣哉其大母亡於延祐丁巳考妣二弟

繼歿於其間距今至元丁丑纔廿一年凡五喪矣予不幸略與之同予生十四歲當大德丁未先考尚書府君棄諸孤至大辛亥遠夫兄廕息州監稅客死官所延祐丙辰先妣范陽郡夫人去世次兄弘夫長兄敬夫以庚申辛酉相踵物故元統甲戌先兄祭酒正獻公又薨皆同胞也嗚呼堯章之悲之思我則知之矣詩云他人有心予忖度之第未能如堯章暴其悲思之心於是編為可媿也

廷對貼黃引

皇慶二年仁宗皇帝詔天下以科舉取士又明年為延祐二年乙卯得士五十六人五年戊午得士五十人七年庚申仁廟賓天英宗即位詔科舉仍舊制時臣先兄國子祭酒謚正獻臣本洎臣裝預大都鄉貢故陝西行臺中丞謚文忠臣張養浩時為禮部尚書實受知焉臣因獲遍閱乙卯戊午兩科進士程文之在掌故者卷牘委積厯屬將半惟乙卯科進士廷對謄錄卷首有讀卷

官考第甲乙語文將竣乙覽所僅存者凡二十九帖護
都沓兒等二十七卷迺集賢直學士臣趙孟頫所批張
起巖許有壬二卷則翰林侍講學士謚文敏元明善筆
也臣私取藏於家二十年矣亞中大夫臣何鏞為之裝
潢成軸臣惟當時之盛典文臣之名筆宜寶惜之昭示
悠久後將有所徵云至元四年秋九月奉直大夫監察
御史臣宋褰惶恐頓首謹識

跋李重山家藏坡帖二幅

凡役事始焉因民之所利而利之既成與民同樂此有
民社者說以使民民忘其勞之善政也借船之帖見之
士大夫立身行己果無媿當世暫被左貶人定勝天付
過之帖惜未免畧露戚戚若夫翰墨之妙當俟識者鑒
諸

書白我庵記後

近代孝子喪親率廬於墓所朝夕守視不忍舍去亦不
死其親之義皆思亭後塵在大賢何足以臧然文人勝

士徃徃筆之於書用敦薄俗尚有所興起其善善豈小補哉詩曰孝子不遺永錫爾類其是之謂乎

書進士題名石刻後

潁川趙君伯器典簿國子監日榻七舉進士題名石刻裝潢各成帙科求一人書其後亦賢者好事之一端也我國家自仁廟睿謨獨斷力興斯文以科目取士累朝繼之起延祐乙卯迄元統癸酉凡七科乙亥暫停後至元庚辰詔復舊制嗚呼興也停也終之復也人乎天耶

伯器殆必有說至正癸未四月跋

跋北山遊記後

國子博士金華吳正傳出詩文一編曰北山遊記蓋其鄉人處士金履祥吉甫許謙益之故翰林待制柳貫道傳今江浙提學黃縉晉卿編修胡助履信某官葉某審言張樞子長釋無一及正傳前後遊金華北山之所作也諸君子以秀爽之資及宴閒之時騁遊覽之樂播賦咏之工披誦之餘敬羨不能已且恨予之不能及也予

行天下見山固多始生於歸州之屬邑曰興山興山在
萬山中少長於鄂於荆壯歲遊朗澧湖湘延祐己未自
南中還燕下大江亂淮沂河達京師筮仕後數被命出
使道齊魯趙衛之交次厯會稽四明溫台括蒼由蘭溪
過衢信踰閩嶺抵漳泉返馬繼而蘄黃同安安隨郢峽
均房諸州郡皆常至赴西臺幕職驛過成臯北芒臨潼
歸途走商鄧間道最所見大則五嶽之華亞焉者居庸
太行終南太白藍田武關天台鴈蕩廬潛九華武當荆

山南條大別之屬洞庭之君山九江之東陵任城之鳧
繹濟南之鵲華不注也雖然大率匪舟則騎或乘筍輿
皆匆遽造次之頃涉歷經過其形勢姿態雄固峭拔蜿蜒
起伏晦明隱見秀麗明潤者固見矣然未之遊為慨
念跋涉之勞未嘗得以歌詩見於紀述蓋予資庸鈍而
職奔走求如諸君子遊覽之樂賦咏之工則未有也是
愈重予敬羨之念然予身雖勞而所見多諸君子遊雖
止北山固樂較其得失殆若不相懸者歟始予雖不獲

預是遊觀其紀述模寫殆盡歷如在目前是亦預也是
則正傳固未嘗以遊夸予而且以遊之樂見及又幸余
固有以酬之去歲秋天子幸上京還予備員小司成偕
正傳恭迓乘輿於昌平馬上指點南口諸峰巒脉絡蟬
聯盤結維軸限隔風氣屏障神臯相與嘖嘖予喜其襟
度目力殊高亢卓朗他日歸以告北山諸君子計必能
如予之想像羨北山之遊之樂至正癸未五月日跋

跋孫履齋周益公二帖

廬陵孫義方以宋相周益公與其高王父履齋論修後漢三國史往復翰墨見示蓋履齋之請急於正名分扶綱常非迂泛強聒者益公辭之篤乃深知其事之不易而慎重之歟今年夏四月宰相以遼宋金三史未有成書上聞聖天子命大臣碩儒總裁其事擇文臣四十人分局纂修裝叨預其一因臆度益公之辭之所以然予既喜今之平園克負斯文重任又竊自欣幸獲執斧鋸以聽梓人之指使已乃復媿樸鈍不文若裝者亦冒昧

秉筆豈不畏南董之鬼笑人耶或謂予曰君家錦半臂
安在至正癸未冬十月第四局史官國子司業宋瑑書

跋宋上舍李文剛誥勅二道

廬陵人

李上舍釋褐乃徽宗罷科目以三舍法取士時也前宋
文舉得人於斯極盛然或有病其濫者上舍由邑簿改
差州學教授其有聲於時者歟迄今二百餘年孫子荐
罹兵燹能保其告身以傳於後亦賢也夫

告身政
和五年

康州

教授李文剛告身以時考之尚書諸臣署銜乃蔡京何

金史卷之八十五
執中侯蒙薛昂也

政和六年太師魯國公蔡少師太宰何尚書左丞侯

跋孟天暉擬古卷後

揚侍郎以太玄準易法言準魯論而劇秦美新君子病之柳柳州作南睢陽碑用駢儷語紫陽夫子謂子厚非不能古文特作劇爾河東孟君天暉延祐間為胄監生明敏英妙質美而行懿由鄉舉得解從事臬司憲部掾樞府進中書西曹及今典國子監簿二十年間讀書不廢亦賢矣哉嘗擬先秦西漢諸作摹倣工緻大夫士皆

與之然遊戲翰墨殆若作劇者其志則子雲也嗚呼文
以載道道之大原出於天其傳則由堯舜迄孟軻氏先
儒稱孟子文章不可及道之傳也天曄進道與文其必
學孟子子歸而求之有餘師秦漢云乎哉

跋艾氏策

臨川艾蜚英十策皆正大周密藿食憂世孰不迂之然
士為世慮不為身謀雖扣閤無從是則可尚比者以才
名辟掾公府獲轉而上聞庶行其言不徒罷神苦心也

昔予先兄集賢正獻公識其兄伯蒼於延祐之季嘗題其文稿曰空言者今予復書是策之末固已美伯仲負有用之學而尤愧謏劣之辭不能如正獻之序空言之蘊奧精切也



燕石集卷十五